

ASO TOFI, 24 IANUARI 2019

Na nofoia le Nofoa e le Fofoga Fetalai i le itula e 9:11 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga ma Galuega a le Fono Aoa Fautulafono.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2018/2019 – felafolafoaiga faaauau i luga o le faitauga faalua

FOFOGA FETALAI: E tolopo Galuega a le Fono Aoa i le po anapo ua maea ona talifuaitau le Afioga i le Minisita mo Aoga, Taaloga ma Aganuu.

Ia, o le avanoa leni e tulai mai ai lau Afioga i le Minisita o Tupe e te saunoa talifuaitau i mataupu sa laga e sui usufono mamalu i le Tala Faatatau Faaopoopo (Nu.1) o Tupe 2018/2019. Ou te tapa ma le faaaloalo lau Afioga i le Minisita o Tupe.

Afioga Hon SILI EPA TUIOTI (Minisita o Tupe): Lau Afioga i le Fofoga Fetalai ma le mamalu o le Palemene, e muamua ona faafetai i le Atua i Lona alofa ma Lona agalelei ua tatou aulia mai ai leni aso fou, ua faafouina foi le malosi ina ia faapea ona faagasolo ai le tatou Fonotaga.

Lau Afioga i le Fofoga Fetalai, e le tele se faamatalaga, pei foi ona silafia, i le tulaga o faiga faavae a le Malo ma nisi o polokalame po o atinae ua ave i ai le faamuamua i leni Tala Faatatau Faaopoopo o le Tupe, sa mafai ona tali atu i le taimi na tuuina mai ai. Ae pei ona silafia o le tatou Tala Faatatau Faaopoopo o le Tupe (Nu.1) 2018//2019, ia ua mafai lava ona faatupeina mai a tatou tupe maua faaopoopo faapea foi nisi o fesoasoani mai a tatou paaga mai fafo i tupe faameaalofa mai e lagolago ai a tatou polokalame na maua mai ina ua uma ona pasia le tatou Tala Autu o le Tupe.

O le isi vaega taua lau Afioga, o le toe fetuunaiga lea o nisi o polokalame po o vaega foi na ave i ai le faamuamua i le Tala Autu o le Tupe, ina ia mafai ai ona tatou tali atu i nisi o galuega ua tataua ona vave ave i ai le faamuamua. E pei ona silafia le siitaga o totogi o le afaigaluega a le Malo. Mo le silafia, o i latou principals seia oo lava ia i latou i totogi amata, tusa e 10% lea ua siitia ai latou totogi. O latou o Deputy CEOs ma CEOs, o latou e 7%. A o tatou o lau Afioga ma tatou o sui usufono o le Maota faapea ma Ofisa Sili o Pulega o Matagaluega ma Faalapotopotoga a le Malo, na o le tai 5%. O le mafuaaga foi ua ala ai ona vaai i ai i le tolu tausaga e faatino ai, o le fua lava i le tulaga e mafai ona gafatia e a tatou tupe o lo o i ai i le taimi leni ina ia aua foi ne i afaina ai nisi o galuega ua ave i ai le faamuamua i le Tala Autu o le Tupe.

Lau Afioga o le agai lava i le tulaga ia tau faiga faavae ua mafua ai le tulaga o le faatulagaina o tatou tupe, i le Tala Faatatau Faaopoopo Muamua o Tupe 2018/2019. E pei ona taua e le gata mai i le siitaga o totogi o le aufaigaluega a le Malo ae ua faapea foi ona ave le faamuamua i le siitia lea o penisione mo le aumatutua. Ua uma foi ona faaali atu, o lo o i ai le iloiloga o lo o amata ona faatino i le taimi nei e toe tagai i ai i se faatulagaga o penisione nei ina ia mafai ona vaai i se tulaga foi lele o le equity ma le tulaga foi lele o le mafai ona matauina e Faalapotopotoga ma Matagaluega a le Malo i tulaga o faamaumauga i le faaaogaina o nei tupe. Ae pei ona taua, ua toe tilotilo i le tulaga e ono tatau ai ona siitia mauuluga le penisione i le masina ae o le a faapea ona vaavaai i le tulaga e aveese ai nisi o faamanuiaga o lo o i ai nei, e pei o le femalagaai i luga o le vaa i le va o Salelologa ma Mulifanua, le tulaga o le talavai ma le tulaga o le tau o le sailia o togafitiga i le falemai. O lo o faatino le iloiloga, o le fuafuaga, atonu a maea ona ave lea o ni fautuaga se i toe tagatagai i ai le Kapeneta, ae afai la ua lagolagoina le faatinoga ma le tupe o le a i ai, masalo o le a mafai loa ona tuuina i totonu o le Tala Autu o le Tupe i le tausaga 2019/2020.

Lau Afioga i le Fofoga Fetalai, e faapena foi isi fesuiaiga, e tilotilo lava i le tulaga ia o le fai ma iloilo tatou faiga faavae nei ina ia ogatasi ma le tulaga ua i ai le soifua agai i luma o lo tatou atunuu. E faapea foi le tulaga o tatou tupe ua mafai ona faaaogaina. E pei foi la ona saunoa nisi o sui usufono i le tulaga ia o aoaoga, i tulaga ia o grants lea ua i ai nei. O lo o i ai le suiga tele pei ona silafia o le tausaga ua mavae, e tolu ituaiga grants ma e faatolu foi pe faafa i le tausaga ona totogi auauai atu i aoaoga faapea foi Ekalesia. O le faiga faavae la lea ua i ai nei, ua tuufaatasi uma lava grants ia i le tasi le vaega ma le faaso, o lea foi ua amata ona totogi atu i tua, ma ua faamatuu atu foi i aoga ma le Komiti Aoga latou te faasoaina le faatauina o stationeries ma tulaga faapena. O le tasi lena o faafitauli sa feagai ma le Matagaluega o Aoga, ona o le tulaga foi lea e fai procurement, o le aufaigaluega tufa i tua, fai inventories ma tulaga faapena, a o lea ua faafaigofie ina ia vave tagolima i ai e le gata i aoga a le Malo ae faapea foi i aoga a Ekalesia, ina ia vave ona faaaoga vaegatupe ia pei ona fuafuaina.

Lau Afioga o se mataupu sa talanoaina foi, o le tulaga lea i le tele o Matagaluega, o avanoa faa-faigaluega e uma le tausaga e le i faatumuina, ona o mafuaaga eseese. Muamua, o le le maua o i latou e i ai le tomai ma le agavaa lea e manaomia i le faatinoina o galuega nei. O le tulaga ua i ai, i le tele lava i faaiuga o tausaga, ua matauina lava le tele o vaegatupe e le o faaaogaina. Mo le agai la i le lumanai, e tatau lava ona silafia, o lea foi ua amata faagasolo le tapenaina o le tatou Tala Autu o le Tupe 2019/2020, e tatau ona matauina e Ofisa Sili o Pulega o Matagaluega aemaise foi o le aufaigaluega, o le a matua tagai i ai le Ofisa o Tupe i se tulaga e taofia ai loa le faaavanoaina o avanoa nei, ona o le tulaga, e tele tausaga o lo o matauina lava e oo loa i le kuata mulimuli amata loa ona talosaga mai e faaaoga vaegatupe ia e fai ma savings e faatau ai computers, faatau ai taavale ma isi mau mea. E tatau ona tagai i ai Ofisa Sili o Pulega o Matagaluega, o lea ua faagasolo le tapenaga o le Tala o le Tupe mo le tausaga fou, o le a matua faigata lava ona toe talia ni talosaga mo ni avanoa. O le a galulue faatasi le Ofisa o Tupe ma le Komisi o Galuega a le Malo, ina ia mautinoa e tuu i totonu na o avanoa e mautinoa o lo o manaomia ma ni tulaga o lo o i ai ni agavaa....

FOFOGA FETALAI: Malie le Minisita se i tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga (Palauli le Falefa): Faafetai i lau Afioga i le Fofoga Fetalai. O le taua ia o le vaega lea ua oo i ai le saunoaga a le Afioga i le Minisita. I le Tala Autu o le Tupe lea na uma atu nei lau Afioga i le Minisita, sa faaoo mai ai le fuafuaga ua faalauiloa e le Matagaluega o Tupe ma le PSC e uma loa Tesema i le tausaga lea ua tea, ona le toe faaaogaina lea o avanoa, vacancies as of 31st December. Ae oo mai foi i le taimi o le faatalanoaina o le Tala Faaopoopo o le Tupe, ua toe i ai foi fetuunaiga, e pei ua flexible, e le o tumau i se tulaga e tasi. Afai ua fai le faiga faavae, ia tausisia, o lena e sao lelei lava lau saunoaga, o le tele o tupe le faaaogaina, o mea o avanoa e le faatumuina. Sa talosagaina foi Matagaluega, afai ua le manaomia avanoa ia, ona toe faatulaga lea o galuega e faaoga ai avanoa ua i totonu o Tala o Tupe. Na o le Matagaluega lava a le Afioga i le Palemia na toe fetuunai avanoa, na reduce ai lea o vacancies sa i ai mai le ono i le lima ae mafai ai ona faatumu e fai ai needs o le Matagaluega. Ma lou faaaloalo lava lau Afioga i le Fofoga Fetalai.

FOFOGA FETALAI: Malo faafetai. Ia se i tulai mai le Minisita e saunoa.

Afioga Hon SILI EPA TUIOTI: Ia, e pei ona talanoa atu, o le a vaai atili i ai i le tulaga lea ina ia mautinoa e le toe tupu mai le faafitauli lea, e le aveesea ai le tulaga foi lea ua i ai ni manaoga i ni avanoa faafaigaluega e manaomia tele lava i le faatinoga o galuega o priorities a le Malo. Ma o le tulaga lena e tataua ona nofo mataala i ai le Matagaluega. Afai ua faapea i le aso 31 o Tesema e faagata ai, ua tataua loa ona fai. Ou te masalo tasi lena faafitauli o lo o i ai nei, e fai a tatou faaiuga faapena ae le o tausisia mo le agai i luma, o le a ou mataituina tulaga faapena ina ia mulimuli i faiga faavae a le Malo, i le mea lea o le fai o le flexibility, e i ai le taimi e fai ai, ae pei ua tau fai ma masani.

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le mea moni lava o lena ua saunoa le Afioga i le Minisita i tatou faiga faavae a le Malo. O lea foi ua laga mai e le Afioga i le sui usufono sa Minisita o Tupe muamua. E matauina i totonu lava o le faagasologa o le tatou galuega, e i ai lava le taimi e ono manaomia ai le uta fetalai ma le fetuutuunai. O le mea lea o le faataoto o faiga faavae, o le mea lena e tataua ona fai, ae o le tele lava o taimi e i ai tulaga e le mafai ai ona toloa se faaiuga e tataua ona toe manaomia ni tagata i totonu o se Matagaluega. E eseese foi manaoga o Matagaluega. O lea ou te manatua le faaiuga malosilava a le Kapeneta i le isi taimi ua lava le tasi o le avanoa faigaluega o lo o talosaga ai le isi Matagaluega i le vaaiga lautele, ae taofi le lua. E tolu masina ae aumai le tasi a le Faauluuluga ia te au le faamaoniga o le taua tele o le lua lea o avanoa sa talosaga ai ma aumai ai lana faamavaega. O i ina la na ou iloa ai le taua o le mataupu lea, ona e na o le Faauluuluga lava o le Matagaluega e na te silafia lea tulaga, i lona ia foi talitonuga maumauai e

manaomia, o lea lava ua put on the line ma lana galuega, ae o le tasi lea o Faauluuluga o Matagaluega e taua tele lona tomai ma lona agavaa. Ia na ou tusi loa lea i ai e toe aumai lau mataupu i totonu e toe iloilo ai le faaiuga a le Kapeneta. E i ai foi le tofa fetalai ma fetuutuunai i le Kapeneta.

O le upu masani o le uta a le potō o le fetalai. E faapena le uiga o faaiuga a le Kapeneta e fetalai e i ai taimi e faataoto ai ia taiala po o faavae, ae a oo lava i le taimi e sui ai, e le mafai loa ona taofiofia e tatau ona tatala se tulaga faapena. O mea uma ia e faia e le Malo, o taiala, e le o ni taiala e tamau. O le uta faafeagai mo le potō o le uta lea a le vale o e taofiofi mamau.

E na o le lua Malo i le lalolagi lea o lo o aumai i le Tusi Paia, o le Malo lea o Peresia ma Metai. A fai loa latou Tulafono, e le mafai ona toe suia e se isi. E oti le tagata na te toe suia. Fea la o i ai nei Peresia ma Metai? Ua leai. O le mea lena e oo i le Malo e faataoto ana faiga faavae ma tu tu faavalevlea ai lava, ae ua oo i le taimi e tatau ai ona sui ma fetalai le tofa. O le soloa i le au fuefue.

O le ala lena e faataoto ai Proclamations o lo tatou Malo, e oo loa lava i le taimi e faafeagai ai le Malo ma faafitauli ogaoga, alu loa ma le Proclamation. E faataatiaese uma lava faiga faavae ma Tulafono uma pe a oo ina feagai le atunuu nei ma faalavelave faafuasei matuia pei o ni afa ma ni taua, e faataatiaese uma lava faavae, faataatiaese uma Tulafono, ae faatino loa gaiōiga i le faautautaga tatau. O Tulafono tuai lava o le common sense. E leai se Malo, e leai ni Taitai atamamai o ni Malo e nonofo lava latou ma saisai o latou vae ma lima i uaea uamea, ma faapea mai o lea ua ou saisai lou gutu saisai ou vae ua le mafai ona ou gaiōi e le mafai ona tupu le mea lena i se Malo po o se Ekalesia e i ai ni Taitai e atamamai. E tatau lava ona fetalai ma fetuutuunai le tofa i lau Afioga i le Fofoga Fetalai, ona ua tupu soo lava le mea lea faapea o faiga faavae faiga faavae, e oo lava i le tatou Faavae sa ne i toe suia. E i ai foi nisi Ekalesia e le mafai ona gaiōi ona o le latou Faavae lea e i ai. E leai se Malo ma ni Taitai e mamao le latou vaai, e nonofo ma toe saisai ia latou vae i ni Tulafono e le mafai ai ona gaiōi. Peresia ma Metai pau lava ia o Malo e le suia ni o latou Tulafono. Fea o i ai? Ua leai, ua soloia e tagata talu ai le faavalevlea o latou Tulafono. O le tutumau i le mea e tasi. E leai se Malo e tutumau i se mea e tasi ua le mafai ai ona toe gaiōi.

Lau Afioga i le Fofoga Fetalai a oo loa i le taimi e faalavelave ma taimi ua iloa ai e tatau ona sui faiga faavae, sui loa, ae le o le tu tu ai lava. Lau Afioga i le Fofoga Fetalai o le lalolagi lea e tatou i ai o le lalolagi e agai i luma tagata e tupu pea tagata, e sui sui ai manaoga o mea e tatau ona fai.

Lau Afioga i le Fofoga Fetalai o le toe faamalamalamaga lena o le mataupu lena i toe tu ae foi se isi ma fai mai o le faiga faavae lea o le faiga faavae lea. E taoto mea na e limataitaiina ai tatou, limataitaiina ai tatou i le tulaga i le aoatetele. O guidelines only. Ae a oo loa ina silasila le Malo ua tatau ona fetuunai, fetuunai loa, lau Afioga o le faautautaga tatau lena .

FOFOGA FETALAI: Faafetai, ia ua manino auofala i lea tulaga, o le uta a le potō e fetalai e pei ona tautala i ai le faugagana. Tulai mai le sui usufono e saunoa, le Minisita o Tupe.

Afioga Hon SILI EPA TUIOTI: Lau Afioga i le Fofoga Fetalai, o lena ua saunoa atu le Afioga i le Palemia, i le tulaga i le taua o faiga faavae, ia ae tatau foi

mai lea taimi i lea taimi, e tatau ona toe iloilo ma faaleleia atili ina ia mafai ona tali atu i manaoga o le taimi lea e tatou te i ai nei.

Lau Afioga o lo o faapena foi ona toe tilotilo i le tulaga lea i le tatou Public Sector Reforms, i le tulaga lava lea ua leva foi ona talanoa i ai, ae le o lava le faatinoga i le taimi lenei o le tulaga lea ia taumafai ia increase le efficiency o le faatinoga o galuega i totonu o le Malo i totonu o Matagaluega ma Faalapotopotoga. E pei o le tele o le taimi ua tele ina process driven ia le faiga o tatou galuega ia ae tatau ona faatulaga o isi foi taimi e tatau ona faaoga le common sense i le mea e tatau ona fai.

O le naunautai lava lau Afioga o le tulaga lea ina ia vave ona faatino ia tatou galuega ia vave ona tali atu i manaoga o le tatou atunuu. Ou te talitonu i le taimi nei i totonu o le Public Service, ua toatele foi ia le mamalu o le aufaigaluega ua i ai tomai faapitoa ua lava aoaoga ma tulaga faapena, ae o le manaomia foi lea ina ia faapena ona tatou faaoga i latou o lo o i totonu o galuega nei, ae o le tele o taimi pei ua taumafai foi lea e specialise, ia ae e tatau ona i ai ia le taimi e le avanoa ese lava ia faapena ona fai ia ni aoaoga trainings i totonu o Matagaluega ina ia mafai ai ona vave tali atu ma faatino lelei ia tatou galuega. E pei o le Ofisa o Tupe lo o ua toe tilotilo nei i nisi o galuega o lo o ona faatinoina, pe le tatau ona faamatu atu i nisi, fai nisi faiga ina ia faafaigofie le tulaga o le puleaina o faletetele a le Malo, o tulaga o le faiga tau Insurance, o isi mea na i le tulaga i le vaai agai i luma, e le o ni core business a le Ofisa o Tupe ia faapena foi le tele o Matagaluega. Ia ae o lo o galulue foi ma le Komisi ina ia vaai i le tulaga lea ina ia aua ne i i ai se overlaps mo mandates aua e tasi lena o faafitauli e ono tulai mai i le toatele o le manaomia o tagata faigaluega ia ae e le o lava ia tatou tupe e faatupe ai ma le tulaga o totogi.

Lau Afioga sa talanoa foi nisi o sui usufono i le taua o sao o a tatou Faalapotopotoga Tumaoti i le faatupeina o galuega a le Malo i le Tala o le Tupe e aualea i dividends. I le vaai a le Ofisa o Tupe ia faapea foi ia le tatou Ministry o le Public Enterprises, ia e matua alagataua ia mea. O le tele o tupe o lo o faagaioi ai ia atinae ia ma galuega tetele i a tatou faalapotopotoga, ia o tupe o lo o saili mai e lo tatou Malo i feutagaiga ma faletupe e pei o le Faletupe o le Lalolagi, Faletupe o Asia ia ma tatou faigapaaga ina ia maua mai ia tupe ia e fesoasoani ai ina ia vave ona faaleleia a tatou atinae tetele ia ua i ai le eletise, o le tulaga i a tatou aualea, ia o aoga ma tulaga faapena, e taua tele. Ia ma o le mea lena e tatau ai, afai loa ua tele se tupe mama a le faalapotopotoga, ia e tatau lava ona fai se sao e tuu ai, e tatau lava ona tuu mai e fesoasoani ai i tupe maua. Ia aemaise lava ia le tulaga o le Malo lea e totogiina atu i le faletupe lena ia nisi o tatou aitalafu i faletupe lena.

Ae momoli atu le faafetai tele lava ua matauina lava le tulaga lea o le siisii pea i luga o le performance a SOEs ia ua matauina foi ua tele ia tupe ua fesoasoani mai ai latou nei, ia ae o lo o i ai lava ia rooms mo le faaleleia atili.

Lau Afioga o lena foi sa saunoa ananafi le Taitaifono o le Komiti o Tupe sa toe talanoa ai foi i nisi o faiga faavae o le Malo, faiga faavae o le Ofisa o Tupe, ia ma apoapoaga foi i ni suiga e tatau ona fai, i le vaai mamao i luma ma tatou tapena ai ina ia faapena ona faamautu pea ma faamalosi le tatou tamaoiga ia ma le tali atu i manaoga taua o le tatou atunuu.

Lau Afioga e faauma atu se faamatalaga i le tulaga o lo o i ai ia le tatou atinae i lenei vaiataimi. O lo o i ai a tatou fuainumera e tau i le faaiuga o Setema, i le 12 masina e faaiu ia Setema o le 2018. O lo o ua matauina ai o le tatou GDP i le faaiuga o Setema i le 12 masina, ua 1.9milion, o se siitaga ua 1.8% lea, pe a faatusatusa i le 1.88 piliona i le masina o Setema 2017. Ia a fua foi i le tulaga lea per capita ia o le numera ua i le faaiuga o Setema 2018 ua 11,307 per capita, tusa ua 2.5% e maualuga ai i lo le 10,900 lea sa i ai ia Setema i le 2017.

Ia o lo o i ai foi ia le tulaga i le fesuaiga o le tulaga o le inflation, ia o le tulaga lena. E fua lava i le tulaga o le tele o a tatou oloa o lo o mafai ona fausia i totonu o le atunuu ia ma faatauina i le maketi o ia ma tulaga faapena, o lo o i ai i se tulaga o lelei. Ia o lo o lava ma totoe foi ia tatou tupe faagaga ia aua fefaatauaiga o lo o siitia. O lo o i ai foi ia tatou export o le luitau lava ia lava ia tatou oloa e ave atu i fafo, e fesoasoani mai remittances ina ia maualuga pea le aofai i masina, e puipui mai i le tulaga lea o le faatauina o tatou oloa mai fafo.

O le tulaga foi o le tatou aitalafu e pei ona sa talanoaina foi i le CDC. Ia i le vaai a le Malo ma le vaai foi a le Ofisa o Tupe ma le tatou Faletupe Tutotonu a Samoa, o lo o mafai ona tatou manage ina. E leai se tulaga e faapopole ai ia le tatou Palemene ma le atunuu i le tulaga faapea ua le mafai ona totogi ia aitalafu. E pei foi ona silafia tatou te o e aitalafu, e borrow mai ona o tatou manaoga ina ia vave ona faatino ia tatou atinae tetele ia e i inei, ina ia faapena ona fesoasoani i le faaleleia o le tamaoiga o le atunuu, ia ma le tulaga lena ia mafai ona tatou tali atu i le fesuaiga o le tau.

O lena ua faamatala i le Tala Faaopoopo ia nisi o galuega tetele lea ua i ai e pei o le auala lea e faasolo atu nei e tau i le malaevaalele, ia o le tatou malaevaalele ia ma isi fuafuaga ia ua faataatia, ua faapena ona ave i ai ia le faamuamua.

Lau Afioga i le Fofoga Fetalai ma le mamalu o le Kapeneta ma le Palemene, ia masalo o lena ua malamalama i le Taitaifono o le Komiti o Tupe Maua ma Tupe Totogi, ia e avatu ai foi le faamalo i lau Afioga i le Taitaifono ia faapea sui o le Komiti, ia mo le iloiloga autu ma fautuaga foi na tuuina mai i le lipoti a le Komiti, ia o le a limataitaiina ai foi ia Matagaluega a le Malo, ma fuafuaga alualu i luma a le Malo, ina ia faaleleia atili ia le tulaga i le tatou tamaoiga ma le tulaga tau tupe.

Ia ae faafetai tele i lau Afioga i le Fofoga Fetalai mo le avanoa e faamalamalama atu ai nisi o mataupu aemaise lava i tulaga tau faiga faavae ma taiala e fesoasoani ai i le tapenaina. Pau le mea i le taimi lenei lau Afioga, ia avea ia lenei avanoa e momoli atu ai le faafetai tele i lou nei tagata i le Afioga ia Lavea Iulai, e pei ona silafia, e lata i le 10 tausaga o tauaveina le tofiga taua o le Pule Sili o le Matagaluega o Tupe. Ia e ese mai lena tele tausaga sa tautua ai i le Sui Pule ma isi Ofisa Galuega Sinia o Tupe, e tele lona sao i lo tatou tamaoiga i le tulaga ua i ai tatou, i le tulaga o le fautua lelei i Minisita ma le Malo, ia ae o le tatalo, ia faamanuia le Atua i lau Afioga, ia aua foi le valaauina a le Atua i nisi galuega po o tofiga, ae faamalo. Ia o le avanoa foi lenei e ave atu ai foi le faafetai i le Afioga ia Leasiosio, ua tulai mai foi i le tofi, e le faigofie tofiga i se isi e faauluulu i ai le Matagaluega o Tupe. Ae e i ai le talitonuga o le a faigofie ona faauu galuega lelei na fai ma faaleleia atili, ona ua ia te ia le tomai. E le gata i le aoaoga, Galuega i totonu o le Malo i tausaga e tolu ma nai masina lea sa fai ai ma faufautua i le tatou Executive Director i le Komiti Faatonu o le Asian Development Bank. Ua tele le tomai e mafai ona faaogaina e le afioga ia

Leasiosio ina ia faapena ona agai i luma lo tatou tamaoaiga. E momoli atu foi le faafetai i le Pulega a le Matagaluega i le tapenaga o le Tala o le Tupe ma le Tala Faaopoopo. O le Minisita ia e na o le sau lava e faitau atu ma faamalamalama atili le galuega, ae faafetai tele.

E momoli atu foi le faafetai tele i Ofisa Sili o Pulega ma Faalapotopotoga, i le galulue soosoo tauau. I le tulaga foi i le tali mai, i le tulaga tau galuega ina ia galulue faatasi uma vaega a le Malo, ina ia faapea ona faigofie ai ma faalelei le coordination ma le galulue faatasi. Ma ia tatou ausia, sini ma taiala, lea ua uma ona faataatia e lo tatou Malo mo le agai i le lumanai. Faafetai tele mo le avanoa soifua.

FOFOGA FETALAI: Malo faafetai saunoa. Ua oo mai le faasologa i le Minisita o Tupe Maua. Tulai mai lau Afioga i le Minisita e saunoa i mea sa laga e sui mamalu.

Afioga Hon TIALAVEA FEA LENIU TIONISIO HUNT (Minisita mo Tupe Maua): Faafetai i lau afioga i le Fofoga Fetalai mo le avanoa. E muamua ona faatalofa atu i lau afioga aemaise foi o le Palemia, le Kapeneta, Minisita Lagolago aemaise foi le la itu o le Maota. Faatalofa atu foi i Ofisa Sili o Pulega ma Faalapotopotoga Tumaoti a le Malo ua tatou faatasi. Aemaise foi lo tatou atunuu o faafogafoga mai i la tatou Fonousu i leni taeao.

Lau Afioga i le Fofoga Fetalai, e le tele foi nisi na afea mai matou Matagaluega e lua o lo o ou tauaveina. O le Falepuipui aemaise foi le Matagaluega o Lafoga ma Tiute. I le galuega i le falepuipui lau afioga i le Fofoga Fetalai, o le vaega muamua o le galuega po o le phase one o le galuega lea ua uma ona faataunuuina ma faamaeaina i le aso muamua o Tesema o le tausaga ua tuana'i. I fale ia e nonofo ai ia le au nofo sala po o e foi e ave atu i uta i le falepuipui e toe fuatai ai o latou olaga. Ua mafai la ona faamaeaina lea galuega i le aso muamua o Tesema i le tausaga lea. Ma ua mafai foi ona tapunipuni pe loka uma le vaega lea o le fale sa fai muamua. O galuega ia o lo o totoe o lo o faagaoioi i le taimi leni lau afioga, o lo o faagasolo nei le fausiaina o le pa taamilo o le lotoa atoa o le falepuipui. E faapea foi le Administration building o lo o faasolo le tender i le taimi leni. Ma auala faapea foi se stand by generator, ma se nofoaga e mapu i ai le aufaigaluega pe a oo ia latou sifi po, ona e mamao ia Tanumalala, e faigata ona feoi i le vaeluapo ona e tolu sifi o le falepuipui o lo o i ai i le taimi leni. O lea la na faamoemoe e fausia ai ni fale, e mapu i ai le aufaigaluega i le po, ina ia mafai ona foi i o latou aiga i le taeao. O le galuega lau afioga i le Fofoga Fetalai, e tele ia lavelave ma faafitauli, e tele foi fesili sa fesiligia ai.

O le faamoemoe o le galuega o lo o i ai i le taimi leni ma le target lea e faapea, e tataua ona tatala ia Iuni o le tausaga leni. I le maea ai o galuega uma nei o lo o fuafua. Ona faapea lea o se taimi o Iuni o lea ua ave ai le faamuamua a le Matagaluega ina ia tatala ai le galuega. E faamoemoe i le lelei o le tau, leai ni timuga ma ni mea faapena. E tatou te taupulepule ma tapena ae faamoemoe i le Alii e mafai ona faataunuuina le faamoemoe lea.

O le tupe sa fuafua mo le galuega leni sa fuafua, e i le va o le luasefulu ma le \$25miliona. E masalo e maea uma le galuega leni i le tupe lea ua aumai nei, i le Tala Faaopoopo o le Tupe o le tausaga leni faaletupe o lo o talanoaina nei, ona

faamaeaina uma lea o galuega lea e masalo e le o toe manaomia se isi seleni. Vagana ai le falepuipui e faamoemoe e fai i Savaii. O la ua tapena le galuega lea mo Savaii. O lea e i totonu i i, o le tupe uma lenei e \$600,000 e fausia ai le galuega lea mo Savaii, mo le tatou anavata, o le mea e lelei i Upolu e lelei foi i Savaii. Afai ua lelei le falepuipui i Upolu nei, ua tatau foi ona sui le falepuipui mo Savaii e toe faafou.

O le tulaga i nisi o faitioga i le o i tua o pagota, e le alo i se ata o le niu. O a uma ia tulaga i le o i tua o pagota i uta, e faatamala o au nei ma le Matagaluega. E le mafai ona o matou alo. Ae tatau foi ona tatou iloainai. O le vaega lea na sosola i le Aso Sa, ou te le o malamalama i le mafuaaga na ala ai ona i i. ona sa o matou lolotu uma lava i le ta o le fitu i le taeao o le Aso Sa, sa matou lolotu ma le toalua lea e sosola i le taimi lenei. Ao le faafoiina i totonu o pa ua uma le lotu.

Ae o le manaia o le lauga a le faifeau, ae sue atu ua le atoa ai le toalua lea. E le faapea la e alo, e leai o le faatamala. Ua avea le seasea foi sosola nisi i le tausaga ua tuana'i ma mea ua faatamala ai au ma le Komesina ma le aufaigaluega i le vaaiga o i latou nei. O le tausaga lea 2018, e toalima ia latou na o i tua, e toatolu ia na toe maua mai i le aso na o ai i tua ae toe maua mai i le afiafi, ae se i vagana ai le toalua lea e fa aso o i tua toe o atu ai lea o i laua i totonu. E le mafai foi ona matou faapea atu e atoa le auunaga. O le galuega o le galuega o lo o taumafai e sui mai ia i i i e tele polokalame o lo o fai i uta. E le gata i le Matagaluega ao i latou o Faalapotopotoga taitasi foi i le o atu i vaiaso uma vaiaso uma, e fai le polokalame mo le faafouina o i latou, o lo o i uta i le nofoaga. O uta i Tafaigata i i i .

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai ..

FOFOGA FETALAI: Malie le Minisita se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea lea e faataua, sa fai le lotu, ae tuua mai le lotu ua sosola pagota. Ae se i toe tilotilo tonu lava i le vaega o le lotu pe o fea tonu le taimi na sosola ai, po o le taimi na moeini ai mata. Afai o le taimi na moeini ai mata, o nisi la lotu, ia fai pupula a outou lotu, ia aua ai ne i toe sosola ai ia pagota ae tou te le o iloa. E na o se tuualalo. Leaga e i ai taimi e tatou te manatu e agelu uma tagata ia e i totonu, ae manatua na ala ona o atu tama na i uta ua faaletonu. Ae lelei ona toe matau lelei i faagasologa ma fesootai i ai ma la outou faifeau, po o le a le ituaiga faifeau. Pe Pope le faifeau, ona fuafua lea po o le a tonu lava le taimi e ono sao ai le sola a le pagota, aua o isi e sosola o moeini o isi e sosola o la e tou te tilotilo i luga i le lagi. Aua le toe tilotilo se isi i luga, ae pupula sao i o i le mea o nonofo ai pagota po o le fai o sauniga lotu i totonu o pa puipui.

FOFOGA FETALAI: Se i tulai mai le sui usufono mo Palauli le Falefa'i ..

Afioga Hon Faumuina Tiatia Faaolatane Liuga: Faafetai i lau Afioga i le Fofoga Fetalai. Ua faatupu manatu foi le faauilavea a le Afioga i le Palemia. Ai

po o faafofoga atu o la e fai mai si faifeau, òUa lotu foi Sataniö. Ae sa ou tuualalo foi i le Pulega, o le ola toefuataina, e amata mai i le Pulega. Aua ua toe fuataina le Minisita ae le i fuataina le Pulega. Ma lou faaloalo lava.

FOFOGA FETALAI: Tulai mai le Minisita mo Galuegá ..

Susuga Hon Papaliitele Niko Lee Hang: E na o se tuualalo foi i le Afioga i le Minisita mo Falepuipui. A matau e lau Afioga ia sauniga lotu la e faatino e taupou sa Monike i Vailima. E lolotu mai lava latou i tua i le potu, a toe fai la ni lotu, loka pea pagota i sela, ae fai i luma ia le sauniga o le lotu. E na o se fautuaga i lau afioga.

FOFOGA FETALAI: Tulai mai le sui usufono mo Salega.

Tofa Olo Fiti Afoa Vaai: Lau Afioga i le Fofoga Fetalai, e na o se fautuaga foi. Faafetai lava i le Afioga i le Minisita i le tau manino mai ua faatamala. O le mea la lea o le Minisita e toa, e tau mai le tulaga ua i ai. O lea e matau atu, o le taimi o le lotu lea na sosola ai pagota. E pau lava se fautuaga, e le iloa po o le taimi lea e fai ai le tatalo lea tou te moeini ai. A toe fai a outou tatalo, pupula uma outou mata aua o le taimi lena o lea e sosola ai pagota.

FOFOGA FETALAI: Malo. O lea la e lagolago mai e le sui usufono lea le saunoaga a le Palemia. Tulai mai le Minsita mo Pisinisi Alamanuia ma Leipa.

Afioga Hon Lautafi Fio Selafi Purcell: E fesoasoani atu lava i le mataupu ua tulai mai. O lea e musumusumu mai lou uso a Minisita mo le Soifua Maloloina, ai lava o fepisiai i le sueina o pagota nei, ao la e lalafi i lalo o le pulelaa. E na ona fautua atu, e suesue muamua totonu o le fale, e le iloa po o lalafi i lalo o le pulelaa ao lea ua soona sue i fafo. Ma le faaloalo.

FOFOGA FETALAI: Malo faafetai, o mea lava e ono tutupu. Ae manaia fautuaga, o le tele o sulu e maua ai figota mo le manuia o le faamoemoe o le Malo. Tulai mai lau Afioga i le Minisita.

Afioga Hon TIALAVEA FEA LENIU TIONISIO HUNT: Faafetai mo fautuaga. Ae o le a ou í í .o la e faafogafoga mai le Komesina i fautuaga ua aumai e le mamalu o lo tatou Maota fononai.

O le Matagaluega o Tupe Maua, sa talanoa nisi o sui usufono mo aitalafu o lo o i ai. E talitonu e sao, e le faapea o lo o i ai ia aitalafu o lo o taumafai le Matagaluega e aoao mai. O le tele foi o aitalafu ia ona o la e fai feutagaiga a le Matagaluega ma Kamupani ia o lo o i ai accounts nei. E agai mai i le tausaga ua mavae, o lo o faalaitiitia mai lava le aofai o aitalafu nei, ona o la e collect mai e le matou vaega a le audit ia accounts nei a kamupani taitasi. O aitalafu foi nei, sa i ai le tausaga na write off ai 2006. O lea la ua toe oo mai i lenai ua faatuputupulaia, ma o lo o i ai le galuega. O lo o taumafai pea le matou Matagaluega ina ia faatalanoa ma vave ona fai le faaiuga. Afai lava e faafaigata e oo lava i le Faamasinoga, e le alo foi la matou Matagaluega e faatino la matou pitolaau, pe a

uma feutagaiga ae tumau pea le eseesea. Ae pei o le tele foi í í .na faamatala atu o le tele o aitalafu ia o lo o fai feutagaiga i audits, reports ma accounts sa fai atu. O le tuai la ona faamaea o ia gaoioiga o lo o i ai se isi vaega tele. Ao le vaega lava ua faafitauli tele, o le a faagasolo i le Faamasinoga.

O le galuega a le matou Matagaluega i le ono masina talu ai, e talitonu e momoli ai le faamalo i le Ofisa Sili ma le Matagaluega atoa, ona o le latou galuega sa feagai ai i le ono masina muamua o le tausaga faaletupe lenei mai ia Iulai e tau ia Tesema i le tausaga ua tuanai. O lo o i ai se faasiliga mai tupe sa tataua ona ao e \$9miliona.

Susuga Hon Tuilaepa Auelua Fatialofa Lupesoliai Lolofietele Neiotti Aiono Galumalemana Dr. Sailele Malielegaoui: Lau Afioga i le Fofoga Fetalai.

FOFOGA FETALAI: Malie le Minisita se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neiotti Aiono Galumalemana Dr. Sailele Malielegaoui: A o le i see ese le Minisita, o le isi lea mataupu e ogaoga tele, o mea ia tau aitalafu. Lea sa aumai malosi e le Taitaifono o le Komiti o Tupe. Ma e ono tuuaia ai le Malo, aemaise o le Matagaluega i le fai mea faatamala. Ae silasila foi i le tulaga o le soloia o aitalafu i lalo o le Tulafono. O le gaoioiga pito i sili lava lea ona faigofie i le Malo ó o le soloia o aitalafu. Aua na ona fai lava o le iuga e soloia, soloia loa, o le action pito i sili lea ona faigofie. E aafia ai Matagaluega uma aafia ai foi Faalapotopotoga a le Malo e pei o le Faletupe lea o Atinae. Ana faapea la e alu tatou i le tulaga lena, na ona faaletonu lava soloa loa i le aufuefue, o le tele o pisinisi, e tai pei o faletalimalo o lo o faalagolago i ai Samoa i tupe maua mo fefaatauaiga ua leva ona tapunia. Vevesi ai le atunuu, i le mea lea o le faatetea o tagata faigaluega. E le tafatasi le itu e tilotilo i ai le Malo. A oo loa ina aumai le mataupu i le Kapeneta, e matua tilotilo totoa lava le Kapeneta i kamupani nei ma le aafia o tagata lautele.

E fia tagata faigaluega, o la e faalagolago i ai aiga ma a latou fanau o le a faamalolo. Ae na ona soloia lava, tapuni, faatetea uma tagata faigaluega, leai ni mea e ola ai, o le matua tele o le faanoanoa ma le faaletonu e oo i le toatele o aiga e aafia. O le ala lena o lea ou te fai atu ai, o le mea faigofie le mea lea o le soloia o aitalafu. E faigofie i suetusi, ma tausi tusi, aumai le fautuaga e tapunia ma soloia aitalafu aua e pau le mea e tilotilo i ai i latou o fuainumera, o fuainumera e tilotilo i ai. Ao tala atu la o fuainumera na, e matua tele lava le mafatiaga e tulai mai ai, aemaise o le mafatiaga o le atunuu atoa lenei. I le tulaga o le mafatia o latou e aafia, ona o tulaga le maalofia, aemaise pe afai e fia afe ma afe le aofai o tagata faigaluega o le a aafia ai latou galuega nei i vaiaso taitasi. A o le mea e faaeteete i ai, o le fiafia o nisi o Matagaluega po o Faalapotopotoga i le mea lea o le fai o aitalafu i le mautinoa e faigofie ona soloia. E tupu tele ai ma le piopio. E tupu ai ma le masalosalo. Po o soloia ona o le tulaga e fai ma se e tau i ai? E tele mau fesili e tulai mai. O le ala lena e faaeteete tele ai le Kapeneta i le mea lea o le aumai loa e soloia, ioe atu le Kapeneta e soloia. E i ai galuega e tataua ona fai, e le iloa po o nisi o pisinisi nei o la e teu a latou tupe i nisi mea. Ao lea e pepelo i i fai mai e le o mafai ona totogi. A aumai la le mataupu, e toe fai atu lava le Kapeneta, e toe o e toe tutiluliloa, toe o e toe talanoa, a faaletonu molia i le Tulafono. Ae o

lea la o le a ou fai atu, o le mea pito i sili ona faigofie, o le soloia. E le o se mea faigata, ae pei ua avea le faaaoga o le tofa mamao ma le faautautaga tatau, ua tauau ina tuuaia ai le Malo lenei, o le Malo corrupt, o le Malo piopio. Ae e tele le mau mea e tilotilo i ai Taitai o le tatou Malo ona faatoa fai lea o se faaiuga. E tusa o lauga ia e aumai, oo loa i le vaiaso lea fai le faaiuga a le Kapeneta e soloia uma aitalafu. Ona uma lea ua soloia ae toe alalaga mai foi, o matua le alolofa lenei Kapenetao. Po o le faapea ane foi o Silasila i nei Kamupani piopio o ai foi ua totogi tupe le Kapeneta.

O le mea lenei e matua tuutuu loloto ai lava le tofa i le mea lea. O le ala lenei o lea ua ou tulai atu ai, ona o le mataupu lea e laga, o ia tonu lea e gafa ma le isi vaega tele ia, o aitalafu soloia. O lea la ua outou faafogafoga i ai, o lea e tuu avanoa le Minisita e faatalanoa ma ave i le Tulafono, na i lo le mea lea o le soloia soloia loa, ma faagalo uma atu ai lava. I vaega ia, latou ia e faaletonu le totogiina o aitalafu, o la e mafai ona totogi aitalafu ae o la e talotalo se i soloia ia, se i soloia ia. O le tulaga lenei lau afioga i le Fofoga Fetalai, ona ua agiga i le Maota lenei a tatou felafolafoaiga.

Ia silafia foi i tua atu o fuainumera, e tele lava le oi ma le mafatia o le atunuu lenei e ono tulai mai ai.

FOFOGA FETALAI: Malo faafetai, ua manino le saunoaga a le Palemia i le faafogafoga mai a le atunuu. Tulai mai le Minisita o Tupe.

Afioga Hon Sili Epa Tuioti: Faafetai i lau Afioga i le Fofoga Fetalai mo le avanoa. O lea foi ua tatou talanoa i tulaga o le faaleleia atili o tatou tupe maua ma tulaga faapena, sa i ai se manatu o le isi faafitauli lea e i ai nei, o tulaga ia e taufesiligia i nisi taimi o le integrity o audit and accounts ia e ave i le tatou au faipisinisi i totonu o le Inland Revenue. O se fesili i le Afioga i le Minisita, pe le ua tatau ona tatou oo loa i le tulaga lea, aumai ni external auditors mai fafo e galulue ina ia faapea ona i tulaga foi lea se i vaai po o lelei, siaki po o lelei le faamaumauina uma o tupe maua a pisinisi nei, pe faapefea ona faatupe a latou investments i le tulaga faapena. A aumai, a fai atu o la e lelei, ia o lo o lelei. Ona o isi taimi ua i ai kamupani ua taitolu masina ua expand. O le fesili pe ua totogi ea a latou lafoga e tatau ona i ai. Atonu o se mea lenei e i ai, ae o le faalavelave foi ia i tatou, e le faapea e vaai maualalo ia tatou auditors. O le popolega o le tulaga lea o le conflict of interest. O i latou uma o lo o fai ma auditors a kamupani nei, ae tatau ona fai se faiga mai lea taimi i lea taimi. Aumai ni external auditors e vaai i pisinisi ia, e le o pisinisi uma. Fai sina random sample e mafai ona vaai i ai, ia mautinoa ai, e leai o lea lava e lelei o lo o comply.

FOFOGA FETALAI: Malo, se i vaai pe le lavea ai ma taavale ia e totogi afa afa aitalafu o tiute ma mea faapena. Tulai mai le Taitaifono o le Komiti o Tupe.

Afioga Aliimalemanu Alofa Tuuau: Lau Afioga i le Fofoga Fetalai, ona o lea na taua i saunoaga, le Faalapotopotoga lea o Suetusi. E manaia le manatu manaia le faasoa, ae pei o se manatu lea e tau ave atu. O lea e tele le tomai ma le silafia lea e i totonu o lo tatou atunuu, na i lo le tau aumai o suetusi mai fafo. Ae manaia le manatu lea o le fesuisuia i tausaga uma. E na o se manatu e tuu atu pea, o lo o

lava le tomai ma le silafia i totonu o le atunuu. O le sosaiete lea a le au Suetusi ma le au tausitusi, e faatinoia le finagalo lea, ina ia i ai le integrity i totonu o accounts ia, audited accounts, ia o lo o tuuina mai i totonu e Faalapotopotoga taitoatasi. Faafetai mo le avanoa.

FOFOGA FETALAI: Malo, tuu atu ia i le saunoaga a le Minisita e faaaauau.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, atonu o le tulaga lea o lo o i ai, o lo o lava pea le tomai i totonu o le Matagaluega i le taimi lenei i suetusi o lo o i ai. A o le agaga ia, o la ua tapena nisi external audits pe maua mai Faalapotopotoga po o Niusila, e fesoasoani atili. E le gata e o mai e faigaluega iinei mo ni vaitaimi, ae o le taimi foi lena e aoaoina ai le matou Matagaluega i e o lo o galulue i le audit division. Ae o lo o lava le tomai i le matou vaega o lo o i ai, ona o lea e faalaititia mai i lalo ia aitalafu nei i lea tausaga ma lea tausaga, e iloa i lipoti o lo o aumai. Ae e le mafai foi ona nofonofo ai le Matagaluega i le sailiili o avanoa, e mafai ai ona maua ni tupe faasili. E leai ni tatou minerale po o nisi oloa, o le lafoga ma le tiute mai le VAGST o lo o maua ai le tupe e atinae ai lo tatou atunuu. E pei ona saunoa le Palemia, e le mafai foi ona matou tapunipunia ia pisinisi. O le matou galuega o lo o fai, ia lelei le matou va ma le au faipisinisi, ma taumafai e totogi mai a latou lafoga. E toatele lava pisinisi o lo o comply mai i le totogiina o a latou lafoga i le vaitaimi o lo o totogi ai, ao nisi o lo o tau faaletonu. O tupe sa aoina i le 2006 e \$2,000miliona, ae o le agaga foi o lo o taumafai i ai ona o le Ofisa foi o Lafoga e tele le confidentiality, e le mafai ai ona aumai i tua, ia te au lenei o le Minisita igoa o kamupani nei o lo o i ai aitalafu nei. E aumai le lump sum ae e le aumaia suafa o kamupani, ona o nisi foi o Tulafono a le Ofisa o Lafoga. Ae o lo o taumafai pea le Ofisa o Lafoga, e ala i le í í í e pei foi ona outou faafofoga mai i le ono masina talu ai, e \$9miliona le faasiliga mai tupe sa fuafua e ao ai. E tusa lea ma le 53.4 pasene o le matou saofaga o le tausaga faaletupe lenei.

O le ono masina lenei e alu atu nei ia Ianuari e tau ia Iunií í í

FOFOGA FETALAI: Ou te faamalulu atu i le Minisita o Tupe maua, se i tuu atu le avanoa i le sui usufono mo Palauli le Falefa.

Afioga Hon Faumuina Tiatia Faaolatane Liuga: Faafetai i lau afioga i le Fofoga Fetalai mo le avanoa. Ua taua tele le vaega lea ua saunoa i ai le Afioga i le Minisita, o le mafai e le Comptroller of Custom ona vaavaai i le lisi o tagata o lea e i ai arrears, ae e le mafai e le Minisita ona vaai i ai.

Lau Afioga i le Minisita, e tataua ona sui le Tulafono. Aua afai e te le mafai ona e silasila i ai, e faapefea la ona e faataunuuna tiute ia e finagalo i ai le Kapeneta ma le Palemene. Afai ua le aumaia foi i le Komiti o Tupe, ae se i silasila i ai lau afioga. E tataua lava ona sui le Tulafono ina ia mafai e le Minisita ona silasila i le lisi o aitalafu taua aua o i e faavae ai au faaiuga. Ma lou faaloalo lava.

FOFOGA FETALAI: Malie se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E sao le mea lea e saunoa i ai le sui usufono. E le iloa po o ai na faia na Tulafono faavalevalea faapena. Ae toe silasila i ai i le teuteuga o le Tulafono. O lea foi e nofo mai ia loia a le Malo, matua faavalevalea tele lena Tulafono, o le le mafai ona e vaai i ai. E tatau lava ona e vaai i ai. Aua a e le vaai i ai e te le iloa kamupani na e piopio.

FOFOGA FETALAI: Tulai mai le Minisita e faaauau le saunoaga.

Afioga Hon TIALAVEA FEA LENIU TIONISIO HUNT: Faafetai o le a taumafai e tapena le Tulafono. E pei lava ona fai atu o le agaga lava ia e mafai ona tilotilo ae saisaitia foi. Ae o le a tapena le Tulafono e tusa ai ma le manatu o le tatou Palemene i lenei taeao. E talitonu lau Afioga i le Fofoga Fetalai e pau ia o mataupu sa laga mai e nisi o sui usufono i le matou Matagaluega.

Avea lenei avanoa e momoli atu ai le faafetai i le Ofisa Sili ma le Pule Lagolago, aemaise foi o le Matagaluega atoa o Tupe Maua ma Tiute. E tusa foi ma galuega sa feagai ai, ae le gata i lea o le masina talu ai aemaise foi o taimi ua tuanai o matou faatasi. Tautuana la tatou galuega i lenei ono masina o lumanai, aua e mafai lava ona ave ese atoa le \$9miliona lea, pe a sioki se masina se tasi. Ae talitonu o lo o mafai pea ona tapue ma taumafai e ao uma mai seleni e mafai ona ao, ina ia mafai pea ona lava le faasoa a le Minisita o tupe ma lana Matagaluega. A faaletonu i tatou ua faaletonu foi atinae o lo o taumafai lo tatou atunuu e faatino.

Faafetai foi i lou itumalo le falelua i Fagaloa ma Faleapuna mo le tapuaiga o la outou sui usufono. Ou te faafetai i faafeagaiga le nofo tatalo, ua mafai ai ona fai o matou tiute i le faatonutonu mai o a outou talosaga. Tatou talosia foi lenei tausaga. Faafetai mo le tapuaiga faafetai i lau Afioga i le Fofoga Fetalai mo le avanoa.

FOFOGA FETALAI: Malo faafetai, o le a sosoo ai ma le saunoaga a le Minisita o Tina ma Tamaitai Atinae o Nuu ma Afioaga ma Agafesootai.

Tofa Hon FAIMALOTOA KIKA IEMAIMA STOWERS (Minisita mo Tina ma Tamaitai, Atinae o Nuu ma Afioaga ma Agafesootai): Faafetai mo le avanoa. E avea foi lenei avanoa ou te faatalofa aloaia atu i lau Afioga i le Fofoga Fetalai o le Maota, e momoli atu le faamalo ma le faafetai mo le faafoeina o le Fonousu a Samoa, malo le faatautai, malo le onosai malo le lavapapale. E faapena foi ona faatalofa atu i le Palemia, le Sui Palemia faapea foi sui usufono mamalu uma o le Palemene ma itumalo taitasi.

E faatalofa atu foi i le faafogafoga tapuai mai a Samoa i ona tulaga faalupe i lau Afioga i Le Ao o le Malo ma le Masiofo, le Sui o le Fono a Sui Tofia, le tapuaiga a Tumua ma Pule Ituaa ma Alataua, Aiga i le Tai ma le Vaa o Fonoti. Ae a le tapuaiga a le afaigaluega tofofi a le Atua i fatafaitaulaga e fia o lo o faapena ona nonomanu aua se manuia o Samoa ma ona tagata. Malo le tapuai. E faapena foi ona faatalofa atu i le saofaiga a Ofisa Sili O Pulega o Matagaluega ma Faalapotopotoga Tumaoti a le Malo, i latou o lo o tua atu i ai le Malo e taulamua i

le taitaiga ma le faatinoina o auauunaga eseese, aua se manuia o le atunuu i ona tulaga aoaotetele. Faamalo le tautua malo le galulue.

E faapena foi ona faatalofa atu ma faafeiloai atu i le aufaigaluega a le Ofisa o le Fono o lo o faapena ona tautuaina le Fonousu a Samoa, faafetai le tautua.

Ae faapito augafa se faatalofa i le faafogafoga tapuai mai a si ou itumalo o Gagaifomauga Nu.1, le Paia lava lea aua le afio o Sao e Fa, le Aiga Sa Umalau, Leatipouniu ma le Faasau, Afio oe le Alii o le Itu na muaimalae, Alaalatai lau Tofa i leTulafale, Alaalatai Leatipouniu ma le Faasau ma le Nofo a Ituaiga ia Safotu. Ae le gata foi i lea o si o matou nuu i Manase i le Afio o Taito ma ona Alo, Alaalatai foi le Fetalai ia Tauasa. E faamanuia atu le tausaga fou i si o tatou itumalo, faamalo le tapuai, faafetai tatalo. E faamalo atu foi ma faafetai atu i le tuualalo.

Ia, lau Afioga i le Fofoga Fetalai, e faafetai ma piiama atu i lau Afioga e tusa ai o le taulaga ua siitia aemaise o le faatagisia o faamanuia a lo tatou Matai Sili aua taualumaga ma galuega a le Palemene mo lenei foi aso, aemaise Samoa i feau ma galuega ma lana tapuaiga. Ona faapea lea o se faamatalaga lau Afioga i le Fofoga Fetalai ma le agaga faaloalo, e le tele se faamatalaga aua e le i i ai ni sui usufono mamalu na sausaunoa agai mai lenei Matagaluega ma lana auauunaga. Ia, seia vagana ai nai timaiga na auala mai faafautuaga, ua faamauina mo le agai i luma e pei ona molimoli mai i le saunoaga a le sui usufono mo Alatau Sisifo po o le Taitaifono foi o le Komiti o Tupe a le Palemene i le po anapo, lea sa ia taua ai le tulaga i le tatou taumafai lea e faasoa ma faasafua le tamaoiga e ala i polokalame ma auauunaga eseese aua se manuia lautele o si o tatou atunuu i nuu ma afioaga taitasi. E faafetai atu ai i lau Afioga i le Palemia, o lea sa e tulai ma tali manino i ia vaega e pei ona faaalua ma e talitonu le agaga ma le mafaufau o lea ua manino, e le gata i le faafogafoga mai a le atunuu a o le mamalu o le Maota i le faamalamalama a lau Afioga, e pei ona e saunoa ai. Ia o le ki atoa o nei tulaga eseese i nuu ma afioaga o lo o i luga lea o sui o nuu po o sui usufono e pei ona i ai i lalo o le vaaiga a lenei Matagaluega o Tina ma Tamaitai, Atinae o Afioaga ma Agafesootai.

E avea foi lenei avanoa e momoli atu ai le faafetai i lau Afioga i le Palemia mo lau saunoaga faalaeiau, lau saunoaga timai aemaise o le faatauaina o le faamaoni o auauunaga nei aua se manuia o si o tatou atunuu i ona tulaga eseese i so o se nuu ma so o se afioaga. Ia o timaiga ia e faataua lo tatou galulue faatasi ma le agaga faamaoni, aua e moni lea... a tatou le faamaoni e leai se manuia o le tatou nuu po o le afioaga o lo o tatou alaala ma papaaao ai, a o lo o taputapuai mai Samoa.

Ae avea ai foi la lenei avanoa e fai atu ai sina faamatalaga laitiiti e tusa ai o le taua o lenei tofi o sui o nuu po o sui o le Malo ma Sui Tamaitai o Nuu e pei ona faaalua e le Afioga i le Palemia. E taua tele le latou pitolaau e faalagolago pulenuu i pulega lelei e auala i le latou tuualalo ma le latou auai i totonu o fonotaga a alii ma faipule, ina ia faapena ona maopoopo pulega, aua a maopoopo pulega, e ala lea i le tuualalo ma le taumafai o le pulenuu, sui o le Malo, sui tamaitai e logoina le pule mamalu a alii ma faipule i taualumaga o fonotaga e pei ona i ai i masina uma ma masina uma, aemaise i le kilivaina atu o polokalame e pei ona i ai le galulue faatasi ai a Matagaluega a le Malo i so o se auauunaga, aua e pei lava ona silafia, o le sini tulaui o galuega a lenei Matagaluega ina ia soifua saogalemu, soifua fiafia ma soifua manuia Samoa. Ma e faalagolago la lea i le faamaoni o le

tatou tautua ma le tatou tauologologo. Ou te fia faailoa pea aua o lea e leai ni au fesili e tali, e i ai mea o lo o faapena ona matou taamilo ai i polokalame, ma o lo o faapea foi ona faafogafoga mai Faauluuluga o Matagaluega, o le ki ma le tatala pei ona ua maea ona folasia i fonotaga a sui o nuu, sui o le Malo ma sui tamaitai o nuu i masina taitasi e ala atu lea i le tatou Matagaluega nei. A outou afioga i Faauluuluga o Matagaluega, e i ai taimi matou te o atu ai i tua ae aumai faasea mai nisi o nuu, na valaau mai le Matagaluega lea e taunuu mai nei i le Aso Lua po o le Aso Faraile i le ta o le fia, e fiu e tatali, ae i ai sasi e i ai lape, e i ai fetuunaiga i mea tutupu i lea aso ma lea aso. Ae faailoa atu ai ia i tatou o Faauluuluga o Matagaluega, valaau mai i le tatou Matagaluega nei, valaau matou i pulenuu ua le oo le tatou polokalame lea. Ma seiloga foi e auala atu i i, ona mautinoa lea o le a faataunuu ia polokalame i totonu o nuu ma afioaga. So o se auaunaga lava, e talosagaina le tatou galulue faatasi, aua o le sini ma le autu e pei ona ou taua, o le galulue faatasi e manuia ai, ae a faapea e sisi lava le fua a le tagata ia po o le Matagaluega foi ia, aua e i ai isi faitioga ua oo mai i le matou taamilo atu, e faapea mai, na taunuu mai foi le Matagaluega lea i le tausaga atu le la, o lea ua savali le tolu tausaga, o le o atuga lava lena matou te le i toe feiloai. E pei o le faasaoina o le taimi ma le taua o le tatou fesootai atu i o tatou nuu ma afioaga e malamalama ai vaega eseese o lo o taumafai atu i ai le tatou Malo aua le manuia o si o tatou atunuu. E avatu ai foi ma le tatalo i le tatou Maota nei, o lo o i ai le tatou polokalame e pei ona ua maea ona faasopolia le 26 itumalo i Upolu ma Savaii lea o le a toe amata le DDP, District Development Programme i le masina fou, a o lena foi ua uma ona logo atu i sui usufono mamalu aso ma taimi e faataunuu ai tatou polokalame ia. O le taua ia o lea e faafogafoga mai itumalo ua maea ona launch a latou taiala, o le taua ia o taiala ia, ma o lea ua i ai itumalo o la e ua fagota le taiala i le suega o seleni aua mea o lo o fia faaleleia i totonu o nuu ma afioaga. Muamua i le faamatalaga a nuu, latou te le iloaina faapea lava latou na o le sui usufono e sau lauga o la e faalogo mai i ai, ona faatalitali lea i le lauga a le sui usufono pe maua atu le mea lea e talosaga ai. Peitai ane, o le toatele o nuu lea faatoa malamalama, e i ai isi auala e ala ia tatou o faiga paaga ma i latou ma atunuu o lo o maua mai ai fesoasoani tau tupe o lo o faapena ona faaso atu. So, o le tatou polokalame la lea o lo o talosaga atu ai i le paia mauuluga o itumalo e 20+ lea e totoe, faamolemole tatou o atu e faamalamalama. Ou te le ma e tau atu, o le tele o taimi matou te o atu ai i isi nuu ae fesiligia; faamolemole lava lau Afioga i le Minisita, tou te le i fetai ma le matou sui usufono? E taligata. E faapena foi le tele o fononotele sa fai mai iinei i le potu lena na faatumulia i le faaiuga o le tausaga talu ai.

O le tatalo, e le aoaia e Laupua Tamafaiga, a o le tatalo o tatou o taitai, aua o lea e taitaifono le sui usufono i le Komiti a le Itumalo, e aofia uma ai pulenuu po o sui o nuu, o sui o le Malo, ae le gata i lea o sui tamaitai o nuu, ua faapena foi ona tofi mai latou e agavaa a le itumalo i totonu o komiti nei latou te faufauina ma silasila atoatoa i mea o lo o manaomia aua le atinae o tatou itumalo mo le manuia lautele o tatou tagata. E tatalo atu ai ma le agaga faaloalo, o lena ua maea ona logo atu a outou Afioga i le polokalame o le masina fou i nuu ma afioaga o le a faataunuu atu i ai lea polokalame i le motu o Savaii, see mai i Upolu ia Mati, e faapena lava ona tatou felogonai i taimi ma aso o le a faataunuuina ai ia polokalame.

E pei o si a matou tuualalo lena, faafetai tele le lagolago mai, a o taumafai atu le Matagaluega ina ia faapena lava ona taunuu le miti, o le galulue faatasi, o le tele o lima e mama ai se avega, ae le mafai ona matou faia toatasi se galuega e aunoa ma la outou lagolago, o lo o faafofoga mai outou itumalo i nuu taitasi e tusa ai foi o le matou talaiga o le talalelei e pei ona faatonuina ai matou e le Kapeneta, aua se manuia lautele o Samoa.

Ia na pau lea lau Afioga i le Fofoga Fetalai, e pei ona ou fai atu, e leai nisi na agai mai ae ia tatou talosia ia le alofa o le Atua o lea ua amata galuega amata o lenei tausaga ina ia faapena ona fesoasoani mai le Atua i lo tatou vaivai ae tatou atinae si o tatou atunuu i le tulaga e tataua ona i ai e ala i lo tatou galulue faatasi. Ia manuteleina lau Afioga i le Fofoga Fetalai faapea le mamalu o le Maota, ae ola le sui usufono mai Gagaifomauga Nu.1. Faafetai.

FOFOGA FETALAI: Malo faafetai. Manaia le saunoaga a le Minisita mo Tina ma Tamaitai, tuli i luma le ai ae faalagolago i le galulue faatasi.

Ia ua oo mai le faasologa i le Minisita mo Faatoaga, Vaomatua ma Faigafaiva.

Tofa Hon LOPAOO NATANIELU MUA (Minisita mo Faatoaga ma Faigafaiva): Faafetai i lau Afioga i le Fofoga Fetalai. E muamua ona faatalofa atu i lau Afioga i lenei taeao fou, e faapea foi le paia mauuluga o le Maota i lau Afioga i le Taitai faapea lea itu o le Maota, e faapena foi i lena itu o le Maota. E faatalofa atu foi i Ofisa Sili o Pulega a le Matagaluega a le Malo faapea foi Faalapotopotoga Tumaoti, ae le gata i lea, e faatalofa atu foi i le Ofisa o le Fono, malo lava le soifua malo foi le lagimama i lo outou paia ma lo outou mamalu. E faatalofa atu foi i le tapuaiga a Lana Afioga Mamalu O Le Ao o le Malo ma le masiofo, le Sui o le Fono a Sui Tofia, le Faamasino Sili ma le Faamasinoga, e faapea foi si o tatou atunuu o Samoa, le paia lava lea i Tama ma Aiga, Aiga ma Tama, le Usoga a Pule ma Tumua, Aiga i le Tai ma le Vaa o Fonoti.

Ou te fia faatalofa atu foi i si ou itumalo i le afio o Tapaau ma le Gafa, Safune ma Taulauniu, le afio o le Aloalii, Tapu ma Lealiifano ma le Toalima faapea le maliu mai o Safune, afifio o Aiga ma Salafai, afioga i le Matua ma le Tufuga, faapea le faatualalua o Salafai Faiga, le Falefia ma le Siuolefanua. E faatalofa atu foi i lau Susuga i le Failautusi o le Sinoti o le Ekalesia Metotisi, e faapea foi faaululuga ma taitai uma o faafeagaiga o lo o faapea ona faafalelemalu i le itumalo o Vaisigano Nu.1. Talofa, talofa lava.

E leai ni mataupu na afea ai lenei Matagaluega o Faatoaga ma Faigafaiva i lenei Tala Faaopopo o le Tupe, ae a faapea foi sa i ai ni tulaga na afea ai le matou Matagaluega, ou te manatu o le galuega ia e faifaipea, working progress, a o le tele lava o mataupu o lo o galulue soosootauau ai le Matagaluega faapea a outou Afioga i le sui usufono pei ona tatou feiloai ai i le tausaga ua tuanai, e le mafai lava ona le faatinoina o outou manaoga. Na pau lava le mea, ia onosai mai o lo o tau faasoa o mea lava e pauu mai le laulau a le Afioga i le Minisita o Tupe ma nai fesoasoani e maua mai a tatou paaga mai fafo, e faapena foi ona vave ona faasoa atu i outou manaoga tatou itumalo. Ia, e i ai nisi mea fou, e pei o le limu sa taua ananafi o la e ua taunuu atu le Matagaluega i lenei taeao e vaavaai po o le a le tulaga o i ai lena faamoemoe ona maua mai ai lea o se lipoti e toe tali atu ai i se taimi o i luma.

Ou te manatu o le a faauma ai i i ma au tala, aua e le tele ni mataupu na laga i le matou Matagaluega, pau lava le mea, tatou faamoemoe i le Tala o le Tupe Autu i le masina o Iuni, ia tele ni a tatou tala e fai, e tele foi ni a matou finauga ma le Ofisa o Tupe la e i ai o le a toe tuu i ai nisi manaoga se tele ma aumai ai nisi tupe se tele aua lo tatou faamoemoe i le tausaga fou. Ma le faaaloalo lava lau Afioga i le Fofoga Fetalai. Ona faauma atu ai lea o au upu. Faafetai.

FOFOGA FETALAI: Malo faafetai saunoa i le Minisita mo Faatoaga ma Faigafaiva. Ua oo mai le faasologa i le Susuga ia Papaliitele o le Minisita mo Galuega, Felauaiga ma Atinae Eseese.

Afioga Hon PAPALITELE NIKO LEE HANG (Minisita mo Galuega, Felauaiga ma Atinae Eseese): Ia e momoli atu le faafetai i lau Afioga i le Fofoga Fetalai mo lou avanoa, ou te tali atu ai i mataupu ma ni talosaga foi sa laga mai i sui usufono mamalu o le Palemene. Ia e muamua lava ona ou fia faatalofa atu ma ou faatulou atu, i le pau o le Maota o sasao nei. Afio o lau Afioga i le Fofoga Fetalai, afio o lau Afioga i le Palemia, afio o lau Afioga i le Sui Palemia, afifio le paia o le Kapeneta faapea Minisita Lagolago, afifio foi le mamalu o sui usufono uma o le Palemene, susu lau Susuga o le Failautusi, faapea le loaloa o le paia o le aufaigaluega o le Maota Fono. Ou te fia faatalofa atu foi i Ofisa Sili o Pulega o Matagaluega ma Faalapotopotoga Tumaoti o le tatou Malo. E faatalofa atu ma faatulou atu foi i lau tapuaiga Samoa, mai mauga tetele seia paia mauga iti, aemaise si ou itumalo palota o le Nuu Tu Taulaga Sasae malo le soifua manuia.

Lau Afioga i le Fofoga Fetalai, o talosaga masani lava ia mai sui usufono o le Maota, e faailoilo ma faatalanoa le Tala Faatatau o Tupe o le tatou Malo, Main Estimates foi Supplementary Estimates o lo o talanoaina i le taimi nei, e aofia ai auala galue, o public roads, moli auala, suavai taumafa, ia faapea se faaleleiga atili o auaunaga a lo tatou Kamupani Vaa o le SSC. O lea ua ou faamauina uma a outou talosaga, aemaise fautuaga lelei uma, aua le sologa lelei o auaunaga uma a Matagaluega uma ma Faalapotopotoga uma o i lalo o lau vaavaaiga.

Lau Afioga i le Fofoga Fetalai ua maea foi ona ou tali atu i nisi o saunoaga mai sui usufono mamalu faapea le Afioga i le Palemia, ae fia faamauina le agaga faafetai ma le faamalo i le Komiti Faa-Palemene o Tupe Maua ma Tupe Totogi, Afioga i le Taitaifono, Sui Taitaifono ma le paia o sui mamalu o le tou Komiti, i le lipoti ua i lumamea nei aemaise fautuaga o lo o tuuina mai, i lalo o le Pulega a le LTA, e aofia ai la mataupu e lua, muamua, sa talanoa ma fautua mai i le lipoti, e toe silasila le Matagaluega i mea ia o patupatu po o road humps. Ia ua talia foi le fautuaga ma o le a toe tagai i ai le Pulega e toe review le tulaga o le maualuga ma le maualalo e tatau ona i ai ia tatou road humps ia.

Lona lua o le sao o taavale afi i le faatupulaia o kasa oona, o le CO2 emission, aemaise ai le sao o le EPC, mai a latou afi eletise e faaogaina ai le suauu diesel.

Sa saunoa ma faatauaina mai e le sui usufono o Palauli le Falefa, le Afioga i le Sui Taitaifono o le Komiti Faa-Palemene o Tupe, e faatauaina ai le tulaga lea o le tau faaititia o le aafiaga o le siosiomaga mai kasa oona.

Lau Afioga i le Fofoga Fetalai, sa ou manatu o le a saunoa mai le sui usufono mamalu, o le a faamatuu mai le vaitafe foi lea i totonu o Sili, o se tasi o afioaga o

lou itumalo aua atinae tetele o le tatou Malo, e ala lea i se afi vai Hydropower Plant, aemaise ai foi se fesoasoani i le vaitaumafa, suavai taumafa mo Salafai. O le mea moni lau Afioga i le Fofoga Fetalai, mai i le saililiga a ni inisia faapitoa mo afi eletise e faaogaina ai le suavai, aemaise ai foi le maua ai o suavai taumafa, o le vaitafe lea i Sili o le a mafai ona faatino ai atinae tetele ia mo se manuia lautele i le mamalu o le atunuu o lo o afio ma papaaao i Salafai, faapea foi tumua nei.

E i ai le lauga a le faifeau sa ou faalogologo i ai, e faapitoa i le Tusi lea o le Faataoto le lauga a le faifeau i le Mataupu 3. Lea ua faalogologo mai le afioaga, aua o le Minisita foi po o le Afioga i le Sui Taitaifono o le isi failauga lelei o le Ekalesia i Nasareta. O le lauga a le faifeau i se tasi o fuaiupu o le Faataoto, fai mai le fetalaiga a le Atua, a e maua se mea, a tagi mai se isi ou uso a tagata, e fia faaogaina lea manuia ua i ou lima, o le finagalo o le Atua, faasoa atu, faasoa atu lea manuia aua lou uso a tagata lea ia lea ua tulai mai ia le....

Afioga Hon Faumuina Tiatia Faaolatane Liuga: Lau Afioga i le Fofoga Fetalai....

FOFOGA FETALAI: Tulai mai lau Afioga i le sui usufono o Palauli le Falefa.

Afioga Hon Faumuina Tiatia Faaolatane Liuga: Lau Afioga i le Fofoga Fetalai ou te faafetai atu i le Afioga ia Papaliitele mo le taumafai lava ia ou tulai atu e fai ia sau tala e pei ona saunoa.

O le matou vaitafe i Sili, na ma o ma le Palemia ma tuuina mai ai le ioega a le nuu o Sili i le 2004, ia ona i ai lea o le fesuaiga o tofi Minisita i le 2006 na toe tupu ai le faaletonu, ua le mafai ai ona faaauau le maliega... i le tulaga lava i le va o le Minisita ma le matou nuu. E le i faapea, na aumai muamua le vai, ae o le taimi la lenei lau Afioga i le Fofoga Fetalai ma le... o le naunautaiga lava o le matou nuu, ia auauna i le Malo. Ae o le faalavelave, ia ua tapuni le fale o Sio, o le la e naunau ina ia faatalatalanoa ma toeaiina ina ia.. i le tulaga ae o le mea na na i ai na aumai le igagato i le Malo, 2003, 2004, na ma o ai ma le Afioga i le Palemia.

O lenei foi e te silasila i le auala na fai mo le atinae lea, ae talu ai ona ua i ai le fesuaiga i lenei vaitau, ia ua le mafai ai ona toe mataa mai le matou vai. Ae o le mea foi lenei na fai ai i le Afioga i le Minisita, fai le auala seia oo i uta le mea pe tau i le mauga, o la e i ai le vai, e sao lelei lava. O la e i ai le vaituloto i luga atu, e mafai ai ona sau ai le isi lea, i luga atu i le va o Sili ma Gataivai.

Ae o le Faataoto lea ou te leiloa po o le Faataoto e fia, ae a foi lea o le fatu pese o Tavita e fatu pese i le isi Ekalesia faaola lotu lea ou te fiafia lava e tilotilo le tama faifeau ia Faafetai. E fatu e le Minisita pese, ae o le leomalie foi ia. Ae o le mea lenei a pese nei le Minisita, e maligi ona loimata, o lona uiga, ua osofia le Agaga Paia, fai le auala galue o Sili.

FOFOGA FETALAI: Ia se i tulai mai le Minisita mo Galuega.

Afioga Hon PAPALIITELE NIKO LEE HANG: Ia le Afioga i le Sui Taitaifono o le Komiti Faa-Palemene, faafetai foi mo le faamalalamaga o le tulaga

lea sa taumafai ai lau Afioga aemaise le Palemia, o la le tusi ma le faaupuga, tatalo pea ma tuitui pea, e toe tatala mai le faitotoa. Se i faauma pea le lauga a si faifeau lea sa ou faalogologo i ai, ae o lea e le o manatua le fuaiupu. E i ai le fuaiupu lena e tau mai ai, a e mauaina i ou aao se faamanuiaga mai le Atua, faasoa atu i lou uso a tagata o lo o tagi mai, ona maua lea e oe le faamanuiaga tele, toe faamanuia lou uso a tagata, ae aua le taofia Aua leaga e le o sou manuia o le manuia mai le Atua.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, o le Faataoto lea e i ai o le Faataoto a Solomona. Ae o le Salamo lea o le a ou fai atu ai, o le tama o Solomona, o Tavita. O la e fai mai le Tusi a Salamo 20, a faauuina lou ulu i le suauu o lona uiga ua afio le Agaga Paia ia te oe, ona taumasuasua lea o lau ipu. O lona uiga, ona tafe atu lea o faamanuiaga, o le mea tonu lava lena Papalii o lea ou te fai atu ai, ia faauuina muamua oe, ona tafe ai lea o faamanuiaga ma manuia ai nisi, ma lou faaaloalo lava.

Afioga Hon PAPALIITELE NIKO LEE HANG: Ia o le faauuga lea na ave i le tama o Solomona, ia o Solomona lava o le atalii o le toeaina lea, ma e leai lava la se eseesea ae o lea la ta talanoa ai...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Malie faifeau ia e toalua se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: e le ola ai se eletise i le lua talanoa i na mea. Ae pei o le mea taua o le faaola o le vai lea e faasau ai le eletise, ua maumau tupe a le Malo na fau ai lena auala i le vaomatua.

FOFOGA FETALAI: Ia faafofoga mai la i le fautuaga, ia tulai mai lau Afioga i le Minisita.

Afioga Hon PAPALIITELE NIKO LEE HANG: Ia ua uma ai la le talanoa i le Tusi Paia, ae pei o le agaga lea e taumomoli atu lau Afioga i le Fofoga Fetalai, o si taumafaiga lea a o ou tulai atu o le Minisita o le malosiaga faaeletise, e taumafai e faatalanoa le mataupu lena, lena ua talanoa atu le Afioga i le Palemia, i le tupe ua invest talu ai le manaoga ina ia maua mai le vaitafe lea o Sili, aua la atinae tetele o le Malo. Ia se i toe taumafai pea.

Lau Afioga i le Fofoga Fetalai, e mautinoa lava o le a maua e Salafai aemaise Samoa atoa ni faamanuiaga tai pei o le eletise, maua pea le suavai i aso uma mo Salafai, faapea le faaititia o aafiaga o le tatou siosiomaga mai kasa oona. Ia taunuu foi fuafuaga mamao o le tatou Malo, e taofia ai le toe faaaoga o afi eletise ae sui mai i malosiaga o le renewable energy, e tai pei o le eletise e maua mai i le suavai, malosiaga mai le la po o le solar energy, biomas ma isi.

Lau Afioga i le Fofoga Fetalai o le upu moni, o le a maua uma ia faamanuiaga pe a faamatuu mai e le afioaga o Sili lea punaoa faalenatura, o le meaalofa mai le

Atua ua faamanuiaina ai le afioga o Sili. O le a tele foi ia se tatou tupe faasao, o le a maua pe a le toe faaogaina le afi suauu diesel generators e fesoasoani i le fausiaina ma le toe faaleleia o tatou auala, aemaise patupatu lea e manatu le Komiti, o le isi lea faaletonu e faateleina ai le kasa oona, lea e puaina mai i taavale afi, pe a taofi i luma, ma toe sui le kia se i tulou, e faaauau ai le faigamalaga.

Ia lau Afioga i le Fofoga Fetalai, o nai mataupu ia e faatatauina foi mai le lipoti a le...

Afioga Hon Faumuina Tiatia Faaolatane Liuga: Lau Afioga i le Fofoga Fetalai ona o lea o le a faaiu mai le saunoaga a le....

FOFOGA FETALAI: Tulai mai le sui usufono o Palauli le Falefa e to le matupalapala o le Afioga i le Minisita, saunoa ia le sui usufono.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, faafetai Papalii mo le faamalamalama. E i ai vaega o le auala e leai ni patupatu o i ai, aua o le foliga o le anavatau lea e fai ai patupatu fai mai o le saogalemu. Ae e sili atu le tele o tagata e le saogalemu, i le kasa lea e aumai e le patupatu.

O le falemai, e leai se patupatu o i ai e na o le vase lava o laina, e leai la se oso o se taavale i luga. O luma o le faleaoga o Puleia, i lou itumalo, e leai se patupatu o i ai, ae e le o lemu ai foi ia taavale. E faapena foi i Salelologa, i mea ia e vase i laina, e leai ma se kasa e alu i luga, e le leaga ai taavale. E le gata la e feoti foi tagata i le kasa oona, ia ae laititi tagata e feoti i le alu i le atoa pe a ona. E ala la ona lavea le tagata i mea ia o kolosi, pe a alu ona, ae a alu lava ma le malamalama o la e alu atu loa le taavale i le vasevase tu. E manaia ia o le faiga lena, aua o le tele foi o taavale e faaleagaina, e tele ai tupe a tagata e alu, e tele ai foi tupe e aumai ai parts i totonu o le atunuu. Ia na o le itiiti foi lea o le tupe lea e manao le Afioga i le Minisita e faaaluina, mo le foreign exchange, ma lou faaaloalo lava faafetai, Papalii.

FOFOGA FETALAI: Ia, faauma mai ua toeitiiti oo mai le tatou taimi manava....

Afioga Hon PAPALHITELE NIKO LEE HANG: Faafetai atu i le afioga i le sui usufono, sa ou manatu e le toe talanoa mai i patupatu, leaga na saunoa le Afioga i le Palemia, o ia lea na faia patupatu. O le a toe tagi mai la ma tomumu i patupatu, ae o lea la o le a ou taumafai e soloia uma patupatu...

Afioga Hon Faumuina Tiatia Faaolatane Liuga: Lau Afioga i le Fofoga Fetalai, o patupatu ia na ma faia ma Tuilaepa, e na o le lua, e lua ina ua fai le auala lea na seal ina ua fai le asphalt lea e alu i Alafua. E lua la patupatu, Papalii ua uma ona aveese, ua leai ma se patupatu i le auala lea e tau i Alafua ma lou faaaloalo lava.

FOFOGA FETALAI: Ia, se i....

Afioga Hon PAPALIITELE NIKO LEE HANG: Ia taatia ia patupatu o le a alu ai le taimi. Ae a foi nei lau Afioga i le Fofoga Fetalai, o le a faaogaina fautuaga a le Komiti Faa-Palemene, i tulaga o patupatu ma tulaga i le faaititia o le tatou gas emission lea e faaleagaina ai lo tatou siosiomaga. Ia ae pei ua faai ai i le tali atu i saunoaga ma talosaga a afioga i sui usufono mamalu, ae agalelei le Atua i lau Afioga i le Fofoga Fetalai, maua pea lou soifua maloloina aemaise lou feagai ai ma tiute faataitai o le Maota o le Fonousu a Samoa, ia manuia le usugafono a le Palemene i lenei aso, soifua.

FOFOGA FETALAI: Malo faafetai saunoa. Ma ua tatou toai taunuu i le tatou galuega masani, o le a saunoa le Minisita e sosoo ai pe a tatou talii mai le tatou malologa masani.

Ou te faasilasila atu o le a faataatiaese Galuega a le Fono Aoa mo lana malologa.

Na faataatiaese Galuega a le Fono Aoa mo lana malologa masani i le itula e 10:47 i le taeao ma toe faaauau i le itula e 11:32 i le aoauli.

Na toe faaauau felafolafoaiga i luga o le faitauga faahua o le Tulafono Tau Faaofi o le Faatatauina o Tupe Faaopoopo (Nu.1) 2018/2019.

FOFOGA FETALAI: Ou te faasilasila atu ua toe amatalia Taualumaga ma Galuega a le Fono Aoa Faitulafono. Malo le onosai malo foi le tauatai ua maua le malosi e faaauau ai le tatou galuega.

Ia ua oo mai le faasologa i le Afioga i le Minisita e pei ona oo mai i ai le faasologa e saunoa talifuaitau i mea sa laga e sui usufono mamalu, le Minisita mo Tagata Tafafao Maimoa Mai.

Afioga Hon SALA FATA PINATI (Minisita mo Tagata Tafafao Maimoa Mai Fafu): Lau Afioga i le Fofoga Fetalai, ou te faatalofa atu i lau Afioga faapea le paia o le Kapeneta i le afio o le Palemia ma le Sui Palemia, faapea foi lea itu o le malu i Minisita Lagolago ma Faauluuluga o Matagaluega a le Malo o lo o faapea ona tatou auai faatasi i lenei taeao. Ia ou te manatu o lea ua matu i fau se taligasua aua foi se faasiliga malosi, ae ou te tulai atu e fai se sao o lenei Matagaluega e tusa ai ma le Tala o le Tupe. Lau Afioga e le o i ai lava ni mataupu se tele na afea ai lenei Matagaluega, ae na o se... ou te manatua na o le toatasi lava le sui usufono na lauga agai i faletalimalo. Ma o le a agai tonu loa se faamatalaga e tusa ai ma lea vaega. Ou te manatu o so o se faipisinisi lava e i ai lava faafitauli e tulai mai i lea aso i lea aso. Ma ou te momoli ai le agaga o le faafetai ia te i latou o lo o faapea ona nafa ma le vaai o tagata tafafao mai fafo po o e o lo o faapea ona latou faia le galuega o faletalimalo. Ou te molimau atu, na o le tagata e lava le fatu e mafai ona ia faatinoa lea vaega. Mo le silafia e le paia o le Maota, ma ou te talitonu foi e leai se isi e faasea ai sona manatu e tupe lava mea uma. E muamua fai lau business plan, e te tilotilo po o fea le itu e maua mai ai le alatupe vave. O

nei mea o pisinisi e tele ni tagata e naunau e faatino. E le faapea ua maua lou degree ona e potu ai lea e saili le tupe. O le business argument po o lou potu masani e fuafua i lea taimi i lea taimi le faaaogaina o au chemics po o auala e ono mafai ai ona e faatosina tagata e asiasi mai po o le atunuu foi. E i ai le talitonuga tasi lea vaega o lo o lapse pe le o faataua tele e tatou tagata o lo o faia faletalimalo, o locals, o tatou tagata. Silasila foi, e matautia le tupe o lo o faapea ona faagaioi ai galuega faatino i totonu o Samoa. O le molimau lea ou te faataitaia atu pei ona i ai lenei vaitau o i ai, ia faataitai i faleoloa o Saina. E fai faleoloa o tatou tagata, e fai foi faleoloa o Saina mai fafo. O le mea lea ua ou matauina, e fiafia Samoa e o e faatau i Saina, ae tuulafoai pisinisi a nai o tatou lava tagata, se i tulou. E le faapea la e tutusa ai, aua o lo o molimau o le pisinisi a le Minisita o Galuega, tasi lea pisinisi lelei, a o se alo e faasino ia Samoa, tainane lona pito i Saina. O a auala ia e faaoga e latou ia e faatosina ai le au faatau? O le mea muamua lava, e i ai pisinisi sa amata le falaoa na siisii atu lava le tau i lalo i le \$1 na oo i le \$2. Ina ua ulufale mai Saina, ua alu ifo le tau o le falaoa ua \$1.50, a o la e faatau e Samoa le falaoa i le \$2. O le eseese la lea o le .50sene ma le \$2, ona e faapea atu lea i sou alo foi po o... -sau e alu e aumai ni a tatou falaoa ia e inu ai le tatou ti i le taeao.øIa ave loa le tupe lea. O fea e end up ai le tupe lea? O le fale o le tatou... e faasino i le tatou tagatanuu e \$2 po o le fale o le Saina e \$1.50? E faapea se lagona i mea ia o faletalimalo, o faletalimalo, e tofu lava le tagata ma ana idea e fai ai, e leai se isi na faapea na faatino le galuega pe fai le faletalimalo i le faamoemoe e gau, leai. O mea uma lava ta te faamoemoe e faatino, e faatino ina ia maua mai se faasiliga o se seleni aua le tausiga o tatou tagata ma aiga ma fanau. Peitai ane, ua le taunuu le faamoemoe. Ae tatau foi ia i tatou o lo o faia le galuega lea o le faletalimalo ona fuafua tatau lou manao i mea e mafai ona e faatino. E i ai faletalimalo e 12 pe 18 potu, ae o le tau ua i ai masalo pe \$2miliona le tau. Ona omai lea o tagata mai fafo, a faapea e tumu potu ia e 20, a faapea e \$500, ia na o le pau lena o le tupe e maua mai, ae tumu potu ia e 20. A faapefea la le \$2miliona lea e i ai i luga? E fia pasene le tului o le \$2miliona lea e i ai nei? O le afaina lena o lea e i ai nei tatou pisinisi, le lava. O Le isi mea ou te fua i ai le mea leni o le faatau, e fua i le tumama. E i ai faletalimalo o le matua leaga lava a ua le talafeauga le tau, ua le tutusa le tau, le auaunaga ma le mea o lo o faapena ona aumai e te alaala ai pe a e alu atu e faaoga i le po lea. Aua o le mea lea o lea e tupu nei, silasila i le faletalimalo o Taumeasina, afai e \$500 i le po pe \$400 i le po le tau, ae a le service? E a le tumama? E leai se mea o na mea e le o oo i ai le sailiili a turisi ia. A o tatou, e fua i lo tatou manao e affordable o le mea e te finagalo e faaalu ai au tupe. O le faalauiloa i fafo, tasi lea vaega o lea ou te iloa o lo o eseese ai pisinisi o lo o umia e papalagi mai fafo ma o tatou tagatanuu. O le saolotoga, o lo o i ai le ulugalii papalagi, ua lua faletalimalo tetele. Mai ia faletalimalo ou te molimau atu, o weekends uma po o le vaiaso atoa ou te le fai atu e fully occupied, ae ou te iloa e le mafai ona i lalo ifo le occupancy mai le afa o tagata o lo o faaaogaina fale nei. E faapena le Sea Breeze, e faapena le Paradise i Lefaga. E taugata ae o foi tagata i mea e iloa e i ai le worth o le latou tupe. Aua foi e eseese le o isi e naunau e fia omai i Samoa ona o le fia iloa o Samoa. O a la mea e avatu e tatou ia omai ai tagata e spend? O le laufofoga o tagata, le integrity aua o i lava e taoto ai lagatonu o mea uma. A e alu e tapena potu, ia

mautinoa aua e te tago ave fua se mea a le turisi, tuu ai pea mea i le mea e taatitia ai ae faamama fale.

Lua, o le attention, you have to be attentive. A i ai le tagata le turisi lava po o ai le tagata o i ai, e tataua ona tatou vaai lelei ma faaali i ai laufofoga fiafia. O itu uma ia e moomia. O le tulaga lea o lea e ia tatou, e tau loa o le tagata e maua mea, oi, se leaga o pai lea, malie ia leaga se i ou alu e vaai ia... o le pisinisi e tutusa uma lava tagata uma. A o le mea foi o le pisinisi, e i ai le fuaiupu foi lea faapea, the client is always right. E le mafai, pe e te sese lava oe, o la e o lo o sao le mea o lo o manao ai le client, ae te alu lava i lalo ona o le sailiga o le filemu ma le nofo lelei. Ia mataulia o le mea o le pisinisi, o le first impression. O le taimi muamua e te ulufale ai, a e lelei i ina, e toe sau pea, sau pea, sau pea. Ae a sese ma leaga ona e faia le tagata i le taimi muamua, o le a le mea o le a e toe sau ai? Aisea? O la e tele isi faletalimalo e te alu i ai. E le i lelei ona vaai au. O itu ia lau Afioga, o tatou ua popoto uma lava Samoa e faipisinisi, ae pau lava o lea, ona o tatou e manao e milionea i le aso e tasi le mea e fai, tasi le aso e suetupe ai le Samoa ae manao na te uu tupe e tele. Ae a le Saina? E taavale mai mea laiti ia pe sene pe lua sene, a o le alu faapea, o le televave ia o le alu faapea o le tupe. O le a la le igoa o le mea lea? Aua e le alu atu le faletupe e faa-bank tatou, o tatou lava tatou te sue le auuala e mafai ai ona lava le tupe o le cashflow. O le survivability lena e depend uma i ai pisinisi.

Lau Afioga i le Fofoga Fetalai, ua faauma atu se faamatalaga, ou te faamalo ma ou faafetai atu i le Maota faapea foi lauia foi o lo o faapea ona tatou faatasi i lenei taeao. O le matou A Team, ou te taua le matou aufaigaluega o le Public Trust, o le Audit, o le Stats ma le Tourism, o le A Team, o le matua lelei lava, e le i lelei atili, a o lea tausaga taumafai ina ia ova atu lo outou silafia ma la outou tautua, tautua ma le faamaoni. Soifua ma ia manuia.

FOFOGA FETALAI: Malo faafetai, ua taliga e fialogo pei o le mauga i Salafai e tasi e le Alataua i le saunoaga a le Afioga i le Minisita mo Tagata Tafafao Maimoa Mai. O lea ua tatou oo mai i le Afioga i le Minisita mo le Soifua Maloloina. Tulai maia e malele ma saunoaga lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA (Minisita mo le Soifua Maloloina): E le toe tau aufagaina paia ma maualuga o le tatou Maota, ou te talitonu o lea ua maea ona paepaeulufanua saunoaga ua maea atu i le afio o lau Afioga i le Fofoga Fetalai, faapea foi le afio o le Palemia, le mamalu o le Kapeneta ma sui usufono mamalu o le Palemene, Faauluuluga o Matagaluega o lo o tatou mafuta faapea foi le Ofisa o le Fono o lo o tautuaina lenei Fono, ae tainane foi le tapuaiga a le tatou atunuu i le afio o le Ao o le Malo, le Sui Ao faapea foi le loaloa o le tatou taunuu i tupu ma ee ma faleupolu tofia.

Lau Afioga i le Fofoga Fetalai, e le tele foi ni saunoaga na afea ai lenei Matagaluega, ma o le a sagai tonu lava lau o le fo i mataupu na laga e le mamalu o sui usufono e fia maua i ai sina faamalamalama, ma le faamoemoe o le a faamalieina ai e tusa ai foi ma le talanoaina o le Tala o le Tupe i lenei Fonotaga.

Lau Afioga i le Fofoga Fetalai, o le vaega o lea sa agai i ai saunoaga a nisi o sui usufono, o le tulaga lava lea i falemai itumalo. O lo o i ai pea le manao ma e le

fou foi lea manao, e tulai mai pea lava i lea fonotaga ma lea fonotaga talosaga a le mamalu o sui usufono, ma o le mea lava e tatau ona fai, o le tiute lava lea o le sui o le itumalo, o le taulagalaga i tulaga ia e faamamaavega aua lea foi auaunaga ina ia mafai ona agavaa uma i ai lona itumalo. Peitai ane, o le tulaga i tatou falemai itumalo, e tutusa lelei lava ma faleaoga, e pulea ma e pasia e le Kapeneta ona faatoa mafai lea ona fai se falemai. Ia e faapea foi pe a toe aveesea se falemai mai se nofoaga ua leva ona i ai, e ui mai foi i le Kapeneta i lana pule, ona o le silasila e silasila lautele. E tele foi vaega o lea e fua agai i ai le fautuaga a le tatou Matagaluega e tuuina atu i le Kapeneta mo ia tulaga, i le aveesea o se falemai po o le toe faaopoopo o se falemai, ona o le vaai lautele i le faafeagai ai foi ma isi vaega lea tatou te le o silasila totoa foi i ai ona o o tatou lava lagona faapito mo tatou lava itumalo, e aofia ai la le aofaiga o tagata i lea vaega. O auala ma nofoaga ma le faasoia o le va o lea falemai i lea falemai, atoa foi ma le vaega taua o le faasoaina o le aufaigaluega pe gafatia ona faasoia le aufaigaluega e faatino ai le auaunaga i ia nofoaga o le a faatalosagaina i le Malo, ona fai lea o le fuafuaga a le Kapeneta ma talia ai se talosaga faapena. O lo o mulimulitai lava la le tatou Matagaluega i faiga faavae ma Tulafono o lo o pulea ai foi le faatinoina o leni auaunaga, e aofia ai ma le fausia o falemai. Ae mo le silafia e le tatou Maota nei, o lea e tapena mai le Tulafono mo le tuufaatasia o le Matagaluega, ma o lo o i ai foi i totonu fuafuaga mo lea tulaga, o le toe silasila lea i le faaleleia o falemai i tua i tulaga talafeagai ia mautinoa ai e agavaa uma tagata uma o le atunuu i le auaunaga lea i se tulaga faigofie ona faatinoina, e pei o le tu latalata i le falemai, o le i ai o le fomai, e pei foi ona aumai talosaga ina ia avatu ni fomai i tua. O le a faapena foi ona tilotilo i ai le tatou Malo i le faasoaina o a tatou fomai ina ia maua le auaunaga lea e tagata uma pei foi ona maua i Apia nei i e o lo o taulalata i le falemai tele faapea foi ma Tuasivi. O lea la, tatou onosai laititi o lea ua amata fuafuaga ia a le tatou Malo ina ia foia ai faafitauli ia pei ona laga mai ma le concern lea a tatou sui usufono e tusa ai ma le auaunaga i nuu i tua.

O le tasi vaega lau Afioga i le Fofoga Fetala'i, o lea sa agai i ai nisi o saunoaga, o le tatou fale faamamatoto, o lea ua uma ona ou tali atu e tusa ai ma le fuafuaga o le toe siitia o le faamamatoto i le nofoaga fou ina ia mafai ai ona faatinoina le galuega mo e uma ona o lo o faatupulaia pea le tulaga o le manaomia o lea auaunaga. Ae le o tilotilo pitotasi foi la i le manaoga aua e tusa o le end result lea ua tatou o nei i ai, o le end result, ua le aoga fatugao, ua manaomia masini e faamama ai le toto, o le galuega lea o lea e fai e fatugao. A o lea la ua tilotilo le tatou Matagaluega i le amata mai o le faaleagaina o fatugao pe mafua i se a ona faaleaga, lea pei ona fesiligia foi e se tasi o sui usufono, preventive, po o le early prevention, early intervention. Lea la e aafia foi i le tatou polokalame lea o le o i tua o fomai ina ia mafai ai ona gafatia ona togafitia o vaega o faamai nei ma tulaga eseese e aofia ai ma le nutrition, o taumafa e mafua ai ona vave ona faaleagaina fatugao. O lo o i ai foi le service a le tatou faamamatoto mo i latou ia toeitiiti lava oo i le faamamatoto. E feoloolo foi le numera o i latou, pe a ma le 300 le numera o i latou o lea ua nofo faatalitali e o i le faamamatoto ina ia taumafai e nofonono ai pea i i ma faaumiumi ai pea i i o faaoga pea vailaau ma fualaau ma togafitiga ina ia tuai ai ona oo i le faamamatoto. Ia pe oo mai foi le valaau o i i i le vaega faatalitali lea, ae le manaomia ai le faamamatoto ona o le faatupulaia....

FOFOGA FETALAI: Malie le Minisita mo le Soifua Maloloina se i tulai mai lava le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ou te tulai atu lava ma le faaaloalo i le Afioga i le Minisita, o lea ou te vaai ma le alofa i le tatou Maota nei, ona o lea ua faafogafoga i le vaega lea toetiiti lava auai e faamama o latou toto. O lona uiga sa fai i ai a outou suesuega, ae ou te le o manatua na fai ni suesuega o le tatou Palemene. E le iloa pe lavea uma lava le vaega la e tuu mai o, ae lelei le vave puipuia ae le i togafitia. O le ala lena o lea ou te matau foi lele i le tutulai mai ma faalavelave i saunoaga a le Kapeneta, o le isi lea mea e mafua ai le toto mauuluga, a o le toto mauuluga e sosoo ma le faamamatoto. Pe o i ai se tatou polokalame faapena, aua o lea lava e faagasolo le tatou Fonotaga, ae tope mai ni fomai e fai se isi tatou siaki ae le i tuua le tatou Fono.

FOFOGA FETALAI: Malo. Se i tulai mai le Minisita.

Afioga Hon TUITAMA TALALELEI TUITAMA: Faafetai lava mo le faauilavea lau Afioga i le Taitai.

FOFOGA FETALAI: Malie le Minisita mo le Soifua Maloloina, se i tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, ou te iloa o le taua ia o le mataupu lea e saunoa i ai le Afioga i le Palemia. Ou te iloa o lea foi e i i le... Na sue lou toto i fatugao ma mea uma i le Aso Gafua lea na tea nei. O la e la e fai mai, o le isi 70 tausaga lea faatoa leaga ou fatugao. O la e la e tau sue se isi e ave i ai le isi ou fatugao, aua o la e lelei uma ou fatugao. O le matou itu o le matua lelei lava o fatugao. Ma lou faaaloalo lava.

FOFOGA FETALAI: Ia, saunoa maia oe le Matua, le sui usufono mo Anoamaa Sisifo.

Tofa LAUOFO FONOTOE NUAFESILI PIERRE LAUOFO (Anoamaa Sisifo): Lau Afioga i le Fofoga Fetalai, ona o au sa ou lauga i le mea tonu lava lea o faamamatoto. O talaatu ananafi sa ou alu foi au ou asiasi i lau fomai, ia ua uma la ona siaki ua ok mea uma. Na pau a le mea lea ua ou tulai atu ai, ona o lea ou te manatua e i ai le aso foi lea na fai ai le suega i tai i le tatou camp i Petesa, le HRPP lea sa siaki uma ai lava. Ia, ona ou talanoa atu loa lea i le isi faipule o lea e nofo i le itu lena ae masalo ua musu e tu i luga. Ou fai atu, o a mai oe? Fai mai, ua ou popole. Ou fai atu, e a? Fai mai ua tatau ona ou pre-dialysis. Ia, fai loa ma le avanoa i le vaalele i le aso e sosoo ai alu i NZ e vaai lana fomai. Ae alu atu fai mai le fomai, e leai lava ma se mea o faaletonu, o lena e lelei lava mea uma, toe foi lelei lava oe i Samoa. Ia e pei o le tala lea, ua uma ona siaki uma le itu lena.

FOFOGA FETALAI: Malo faafetai mo le faamalamalamaga o lea vaega.

Afioga Hon TUITAMA TALALELEI TUITAMA: Faafetai mo faauilavea. E faaataata a lafoga a o le tulaga lava e ogaoga le tulaga ua i ai le tatou atunuu i le taimi nei i le lamatia o le soifua ona o ia tulaga, o lea e iloa i figures, e iloa i le numera faatupulaia o i latou e toto maualuga. E sao lelei le saunoaga a le Afioga i le Palemia, tasi lea vaega e aafia ai fatugao, o le toto maualuga, o le suka, o le isi lea vaega e aafia ai fatugao, o le tino puta. O le isi lea vaega e aafia ai fatugao. Mo le suka lava ia, e leai lava se isi ua tau lamatia le maualuga o lona suka, ia vave ona togafitia ma taofiofi ai i ina, leaga e ogaoga aafiaga o le suka. O le suka a ia, e lima lelei faafitauli e tulai mai ona o le suka, e mafai ona e tauaso ai aua e afaina ai mata, e mafai ona afaina ai lou fatugao ma e agai ai i le faamamatoto. E mafai foi ona leai ai ma ni ou aao e te savali ai ona e faaoga lea o le wheel chair pe afai e inject ni infections i ou aao, i vae. E ono maua ai foi i le toto maualuga, talu ai ona o le faaletonu o ou fatugao. E ono faaletonu fatugao ona o le maualuga o le toto, e ono maualuga foi le toto ona o le faaletonu o ou fatugao. O laasaga la ia e aafia ai e ono aafia ai le tagata e suka, e tasi le gasegase, ae tele ona aafiaga. A o le ala foi la lea o le fuafuaga lea ua agai i ai le tatou Malo ave i tua le auaunaga, vave iloa ma saili, lea sa saunoa le Taitaifono o le tatou Komiti Tupe i le PEN (Package for Essential Non Communicable Diseases) faa-Samoa lea o lo o faagasolo nei. O le agaga moni lea o le PEN faa-Samoa lea e faagasolo atu nei, o lea lava e taumafai ina ia aafia uma lava le tatou atunuu, ia maua uma i latou o lo o toto maualuga, maua uma i latou o lo o i ai le suka, ma le agaga foi lea na saunoa i ai le Taitaifono. ia taumafai ina ia aoao le komiti tumama latou te faia le galuega lea o le siaki o suka, toto maualuga, lipoti i fomai ma fautua e o lo o inu fualaaui ina ia faaauau pea le inumia o latou fualaaui pe afai ua uma a latou fualaaui, aua o le tasi lea tulaga o lea e ono faatupulaia ai o latou faaletonu ona e uma lava fualaaui ona nofonofo ai lava lea, ae i ai foi lava nisi e avatu fualaaui ona ave lea faaputu i totonu o le pusa ae le inua. Ia tasi na tagata o lea e alu le aoga ai le tatou penisione.

Lau Afioga i le Fofoga Fetalai, sa fesiligia le auaunaga lea i Savaii. I le taimi nei, e tolu gasegase la e i Savaii, e ono masini la e i ai i le tatou fale faamamatoto. E tolu sessions i le vaiaso e faamama ai toto o i latou. O le capacity o le faamamatoto lea e i Savaii e ono oo i le iva masini. A oo la i le iva masini, ona 18 lea o mai e mafai ona faamamatoto i le tulaga lea e faatolu i le aso, ae afai e faatupulaia, ona ono loa lea o aso o le vaiaso ma oo atu ai i luga i le 36, ua double le numera e mafai ona faamamatoto i le vaiaso. O lo o tele la le capacity o le tatou facility lea o lo o i ai nei i Tuasivi mo le agai atu mo se isi lima tausaga pe a. Ia o le tali atu lea e tusa ai foi ma le mataupu sa laga mai i le tulaga lea.

Ona ou oo mai lea lau Afioga i le Fofoga Fetalai, sa fesiligia le tulaga lea o le redundancy foi lea i le merge. O lea tulaga i le redundancy, e mulimulitai lava le Malo i Tulafono ma taiala o lea ua faataoto mo tulaga faapea, aua e le faatoa tupu lea o se mea faapea. O la e ua uma ona tapena Tulafono e mulimulitai ai foi le Matagaluega i le faatinoina o lea tulaga mo e ua agavaa i ai i lea tulaga. E le mafai ona alo ai le tatou vaai i le faatinoina o vaega ua uma ona faatulafonoina po ua uma foi ona i ai ona taiala e tusa ai ma faavae ua faataotooto.

Lau Afioga i le Fofoga Fetalai, ona pau ia o nai vaega sa laga mai e sui usufono, o lea ua taumafai atu i ai, a o lea o lo o talia le Tulafono a lenei Matagaluega e oo mai i se taimi, ona toe laga lea o nisi vaega e tusa ai ma le Matagaluega, e piitaga i ai i le Tulafono o lea o le a tuuina mai i le Maota i se taimi e le o mamao.

Ia, ia agalelei le Atua i lenei Maota ma le faafoeina o le tatou Fono, e faapea foi le tofa saili ma le tofa faasoa i le paia maualuga o sui usufono o le Palemene. Manuia le tapuaiga a Samoa. Faafetai i si ou itumalo o Faleasiu i la outou tapuaiga, aemaise matua faaleagaga ma le aufaigaluega a le Atua o lo o tapuaia faiva o le Palemene. Soifua ma ia manuia.

FOFOGA FETALAI: Malo faafetai, malo saunoa i lau Afioga i le Minisita mo le Soifua Maloloina, o tama ma Tapaau e tausi vaatele e le igoa o le Faletolu ma Fuaifale.

Ia, ua oo mai le faasologa i le Afioga i le Minisita mo Pisinisi, Alamanuia ma Leipa.

Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa): Faafetai atu i lau Afioga i le Fofoga Fetalai. A o le i faia se tala, e muamua pea ona faatulou i le paia o le Maota, i le afio o lau Afioga i le Fofoga Fetalai, afio le Taitai o le tatou Malo, Aiga Kapeneta ma Minisita Lagolago, aemaise le paia o lena itu i Taitaifono o Komiti ma le mamalu o le Palemene. E faatalofa atu foi i le faafofogaaga a Samoa i le tapuaiga a Samoa i ona tulaga uma, mai lava mauga tetele seia paia mauga iti, malo i la outou tapuai i le alo atu o le Palemene a Samoa i lana Fonotaga muamua o lenei tausaga.

E faatalofa atu foi i Faauluuluga o Matagaluega ua mafai ona tatou faatasi. E faatalofa faapitoa ia i latou ua seei mai i le tofi o Faauluuluga o Matagaluega i lenei tausaga aemaise foi i latou ua toe tofia i a latou konekarate mo le isi tolu tausaga. Ia, sagai ane ai o le tai, alo mai laia tatou galulue, aua o outou lava e vae ma lima i ai le Palemene nei, aemaise o Matagaluega ma le Kapeneta.

E faatalofa atu i si ou itumalo o Satupaitea i le susu o le Vaaiti ma le Vaaimalae, susu le Aiga Samoeleoi, afifio Tapaau, alo o Lilomaiava, Aiga Sa Valomua ma le Suafa o le Fauatea, alaatai oe le Alataua i Tapaulefano, le nofo a Pule ma le Matuafia. Le tapuaiga a faletua ma tausi, saoa, aemaise auauna a le Atua o lo o asuina le vai o le ola i totonu o le tatou itumalo. Faafetai le taputapuai mai a o alo atu lo outou sui usufono e fai lana auaunaga e pei ona outou tofia ai i lenei Palemene.

Lau Afioga i le Fofoga Fetalai, o le a taumafai atu i ni tali i le aotelega o ni manatu sa fetalai ma saunoa foi i ai sui usufono mamalu. Atonu o le a le otooto atua sui taitasi, ae o le a avatu se faamatalaga i le auga atoa o manatu na aumai ma tulaga o lo o i ai taumafaiga a le Malo. O le tele lava o mataupu sa faaali mai, o lea sa faamalamalama atu ananafi. O nisi mataupu, o mea lava o lea ua amata ona gaoioi i ai le Matagaluega, e pei o le minimum wage, o lena ua uma ona fofoga atu, o lo o gaoioi le Matagaluega o le MCIL e iloilo le tatou Tulafono ona aumai ai foi lea o le apoapoiga i le Kapeneta ma fautuaga ona oo mai ai foi lea i nei le tulaga lea i le minimum wage. E pei ona saunoa le Palemia, e le o se mea faigofie, o lea ua feutagai i totogi o le Malo, e faapena foi ona faigata le totogi o tagata lautele, ona e tele itu e tataua ona tilotilo i ai, a o lea ua faagasolo le galuega tele

lea. O le tatou Malo foi o lo o naunau ina ia maua e tagata faigaluega le tomā faaonaponei, o le tomā lava e pei o nuu i fafo, lea e aafia ai tataou vaega o apprentice. O lo o i ai se galuega soofaatasi i le tatou Matagaluega lea o Leipa ma le tatou Iunivesite atoa ai ma le tatou Matagaluega o le SQA, ina ia mautinoa o aoaoga o lo o aoaoina ai tatou tagata ia o trades, trades people o aoaoga o lo o tutusa ma atunuu i fafo, lea o lo o base le tatou taumafaiga lea i tomā o lo o faaaoga e Niu Sila ma Ausetalia. O nuu na o lea e latalata mai ia tatou, ma e faigofie ona tatou feutagai. E i ai foi ni fesoasoani faapitoa mai ina ia mautinoa e le maualalo le tulaga o lo o aoaoina ai o tatou tagata e pei o le Matata Eseeese.

E faapena foi i se mataupu na laga mai e se tasi o sui usufono i le tulaga ua tulai mai i lenei vaitau. E lagona ai foi le faanoanoa ma le popole o le mafaufau i tulaga ua tulai mai i mea nei o tatou tagata foi nei security officers o lo o galulue i mea nei o faletalimalo o lo o taumafa ai le ava malosi. Ia o lea ua maua i faamaumauga faaonaponei, e pei e solomua ia i latou. Ia atonu o le lelei o le aoaoina e i latou o lo o faafaigaluegaina ia tagata. O lea la o le a tilotilo foi i ai le Matagaluega, o lo o i ai le tatou Komiti foi lea o le National Tri Party Committee, e aofia ai sui o le Malo, sui o le aufaigaluega, sui o e ana galuega, atonu o i ina e maua ai se foia o le mataupu lea ua tulai mai. Aua o le kolēniina lava ia o tagata faigaluega, o le matafaioi lava lēna a le tagata o le na te faafaigaluegaina tagata. A ua tulai mai le tulaga ua lamatia ai le soifua o tagata ona o pisinisi ia e galulue ai tagata nei, ia atonu ua tatau i le Malo ona fai se fuafuaga. Ae taatia mai le manatu, e lagona lava le faanoanoa.

E pei foi ona taua e se tasi o sui usufono, o le ulufale mai o fualaa faasaina matautia lea ua i ai i le taimi nei, atonu tasi ia mea o lo o fesoasoani i le le taupulea o amio, atoa ai ma le le aoaoina lelei o latou o lea e faafaigaluega faa-security officers, lea e mafua ai, ae na ona faapea lava, o le ona lava o le tagata, vaeatu lava, togi i fafo, a fia ulavale, fai i ai le isi faiga ia vave ai ona alu ese. E le talafeagai ia tulaga. Ae taatia mai le manaoga se i tilotilo i ai po o le a le tulaga e oo i ai. E oo foi i le tulaga lea e ono faasaina ai nisi off the street lea e o atu e sue galuega, ae ave lava na o i latou o lo o i ai le tomā e aoaoina ai tagata faa-security, i le vaai a le Malo i le lumanai. Thats the option. O le tulaga lēna i le agai i luma.

Ia sa laga foi le mataupu i le ACC, e pei ona fai atu, o lo o i ai galuega o lea e faagasolo a le ACC e toe review atoa ai lava le coverage o lo o mafai ona fai i le taimi nei. O lo o i ai lava faamanuiaga eseese i le tulaga e tulai mai, a o lea ua faagaoioi foi le review o le Tulafono ma galuega a le ACC. Ae tilotilo pe i ai se isi auala e sili atu ai le fesosoani ma sili atu ai le agavaa o nisi atonu i le taimi nei e le o agavaa i lalo o le kava a le ACC. Na malaga foi le sui o le tatou faalapotopotoga lea i Niu Sila ona o le manatu lava lea se i tilotilo po o le a se auala e faaleleia atili ai le auunaga a le ACC ma tulaga uma lava. O lea la o lo o galulue i le taimi nei ona oo mai foi lea o se lipoti i le Kapeneta ma ni fautuaga ina ia lelei atili le agai i luma o le auunaga.

Sa tulai mai foi se tasi o sui usufono ma aumai foi ona manatu ma le suiga o le Tulafono. Faafetai atu i le sui usufono mo Salega, atonu e taatia mai au suiga se i tilotilo foi i ai. E leai lava se manatu e talituaalimaina pe le faatauaina e Matagaluega uma nei, e faataua uma lava outou finagalo. Mo le silafia e le Maota nei, o masina uma lava e fono ai au CEO, matou te fono lava i masina uma, ma

faasoa ai la manatu faapea, faasoa o latou tomai ina ia maua le agaga lea o le galulue faatasi. Pe 18 Matagaluega e tasi lava le auga o le latou galuega, ma o le feau foi lea ou te avea i ai i fono uma, fono uma. E tasi lava le auga o le tatou galuega, auuuna tagata, atiae le tatou Malo, aua ne i alu lava le tagata ia. O mataupu la nei e laga i totonu o fono faapenei, o i ina la e ave i ai le matou sector e talatalanoa ma aumai ni o latou manatu e fatu ai le agai i luma.

E faafetai atu i tatou Faalapotopotoga Tumaoti ia o Public Trading Bodies, o lea ua outou faafofoga mai o lo o amanaia tele e le Malo lo outou sao e ala i tatou dividend. Se i tautuana lava ia aveave ai pea. O le manatu lava o au nei o le Minisita, theres always room for improvement o le tatou galuega ma le tatou... e faapea foi i le tatou tupe maua, theres always room for more. O lea e utiuti le tatou seleni a o tatou e faamoemoe i ai. E faamalo atu i Matagaluega o lea lava e toaga e totogi le latou sao, dividend. O isi foi Matagaluega e tau fai si augata. Faamalo atu i le tamaitai pule o le MPE, e tiga lava ona tuu mai faamatalaga foi faalefetaui, ae o la e lava e fai lana galuega e pei ona tofia ai.

FOFOGA FETALAI: Tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga: Faafetai i lau Afioga i le Minisita. Faamalo galue. Ou te iloa e taua tele, sa ou fia tu atu foi ua e taua le ACC. Ou te iloa e te tau manatua le faalavelave na tupu i Tafua na lavea ai foi ma le tamaitiiti o lou aiga. Ma o le tamaitiiti lea tulou le Maota ma le faafofoga mai a Samoa, e le i atoa se masina talu ona faigaluega. Na tupu loa le faalavelave, e le gata ina fesoasoani i ai le ACC i le maliu, ae na faatulaga ai foi ma le tupe e ave i si ona tina, ma le tupe e maua mo le lima tausaga, ae le i atoa se masina talu ona faigaluega, ae lima tausaga lea na ave i ai e le ACC le faamanuiaga i si tina lea ua afaina si ona alo talu ai le faalavelave lea na tupu i le oneone i Tafua.

O lona lua lau Afioga i le Fofoga Fetalai aemaise le Afioga i le Minisita, lea sa ou musumusu atu i lau Afioga, se i tagai ane lava i le UTOS. O le UTOS i lou taofi ma le mafuaaga na faavae ai, e le o se trading body. E tai tutusa lava ma le natura o le NPF, o le ACC ma le SLAC, a o lea ua ave le dividend e faagaoioi ai, ia na o le 200, 300 i le tausaga, ae sa i ai lou taofi e toe faafoi le tupe lea e faalelei ai iunite a nai tagata ia. E tai pei lava o saofaga ia e fai agai i le NPF a le aufaigaluega, ae o le faamoemoe lea, ina ia atinae ai ni tamaoiga e fai ai ni o latou share i le faatauina o kamupani e pei ona i ai le SamoaTel. Ma lou faaaloalo lava lau Afioga.

FOFOGA FETALAI: Ia, se i tulai mai le Minisita e faaiu mai lau saunoaga.

Afioga Hon LAUTAFI FIO SELAFI PURCELL: Faafetai i le faauilavea a le sui usufono mamalu. O faamanuiaga na o lo o galulue ai le ACC e pei ona ou fai atu, e tele lava ituaiga coverage eseese e faigata ona faamalamalama atu i se taimi faapenei e tulai atu ai, ae o lo o avanoa lava le tatou Matagaluega pe a i ai lava se tagata e le o malamalama foi lea, e le fia malamalama atili i faamanuiaga eseese o lo o maua i lalo o le tatou Matagaluega lea. O lea ua aumai e le sui usufono se tasi o faaitaiga, ou te iloa foi le faalavelave lea. Na oo mai foi le faafetai a nisi o aiga o i latou sa maliliu i se faalavelave matuia, ia atonu foi ua faaletonu le

faagaioioiga o le galuega ua tupu ai le faalavelave faafuasei lea. O lea foi o le a ou talatalanoa i le Minisita o Tupe e uiga i le mataupu lea. E le na pau lea o le Matagaluega o lea ua sui mai le stages mai le trading body i le beneficiaries body. Na tupu muamua foi, ae se i talatalanoa i le Matagaluega o Tupe i le Minisita ona maua ai foi lea o se tali o lona mataupu.

E toe faafetai atu ai i a tatou public training bodies lea o lo o taumafai mai pea, a o i latou o lo o faaaukatata, o lea ua outou faalogo mai, e tua le Malo ia i tatou. Ia aua le tau suesue ni auala e le totogia ai le tou dividend mai lea masina ma lea masina, o lea tausaga ma lea tausaga. Tautuana mai ma outou.

O tatou seasonal workers, o lo o solosolo lelei le tatou scheme lea. O lea ua saunoa mai se tasi o sui usufono i faamanuiaga i lona lava nuu, i lona itumalo. O le auga tonu lava lona o lo o taumafai i ai le tatou Malo, o le anavatau o le tatou atinae, le tatou strategy for the development of Samoa, *improve quality of life for all, for all*. O auala la ia faapea e maua ai ma ausia ai le anavatau lea, o lea la ua saunoa mai le sui usufono, ua i ai taavale e fa, ua lelei fale. That's quality of life. O le mea lona o lea e taumafai i ai, o le tatou seasonal work lenei, e le faigofie, e tele foi manaoga o tagata. E leai lava se sui usufono e le o sau fai mai e fia faamuamua ane ana tagata. E tofu lava tatou ma... A o le faigata foi ia ona tau faamalie tagata ia e faafaigaluega ai o tatou tagata i fafo, e le gata i Niu Sila, ae faapena foi Ausetalia. E fai foi o lo tatou naunau atu, a o la e foi e i ai latou auala e mananao ai latou i tagata faapitoa. E le manao lava e sui atu tagata i le fitu masina uma, aua e avatu foi toe koloni ma faataitai i ai le faiga o galuega, a o lea lava e taumafai le Matagaluega ia tau laugatasia Samoa atoa i lea foi manuia i auala o lo o taumafai e fai. Afai la o lo o i ai nisi o le paia o Ekalesia mai tou alaalfaga o lo o tuitui atu pea ia te outou, ia, o le tatalo lava, ia mau lava le toovae. O lo o tau faasoasoa atu lava, ua toatele naua le lisi faatalitali ae o lo o laitiiti avanoa e maua mai fafo. O Niu Sila lava ia o lo o i ai le latou tapulaa. E le mafai la ona tatou soona lauina atu ni tagata, a o la e i ai le tapulaa e gata ai tagata mai le Pasefika. O Ausetalia e feoloolo, ma o lea ua taumafai lava ina ia toatele ni tatou tagata e agavaa i le malaga atu i Ausetalia i le tausaga lenei, a o lo o solosolo lelei le tatou polokalame lea.

O le tatou vaalele lau Afioga i le Fofoga Fetalai, e lagona lava le fiafia ma le faagaetia i le faalogologo atu foi i saunoaga i le lagolagoina o le tatou vaalele. Atonu o le agaga lava lea e ui e le i afea uma e sui usufono, ae ou te lagona ua faagaetia lava le tatou Malo i le auaunaga ua oo mai ai le tatou vaalele o le Samoa Airways i lenei vaitau. O le taimi lenei i le tausaga lea na tea nei, sa faafaigata lava ona taumafai e convince le tatou Palemene nei, o le miti lenei, o le miti a tatou uma. O le miti lenei o le miti e agai ai Samoa i luma. This is a dream to take us forward. Ia lea ua amata ona ata mai, lea ua tasi le tausaga ma nai masina, a o lea ua lagona lava le lelei o le auala, lea ua overtake e tatou le Air New Zealand, le kamupani tele, i tagata tatou te felauaia. O le a le mea o lea na fai lava le tatou vaalele ma le aim ina ia faafaigofie, faataugofie ona femalagaai tagata mai Samoa ma o atu i fafo atu o Samoa. O lea la ua taunuu. E avatu ai le faamalo, pei lava o lau tala na fai i le taimi foi lea i le tausaga lea, it takes a nation to run an airline. Lea la ua alualu i luma le tatou atinae. Aisea? Ona o le lagolago a le atunuu, aemaise o a outou Afioga i sui usufono o outou o lo o fai ma sui o le tatou atunuu atoa, e tatalo atu lava, o le tatou vaalele, omai e lagolago. E leai foi

se auunaga e atoa. O nai mea laiti e ono ponatia ai le auunaga, a o lona aotelega, ia atonu ua faamalieina le atunuu. o le mea foi lea ua liliu mai ai le lagolago a le tatou atunuu. E momoli atu le faamalo. O le masina fou e taunuu mai ai le tatou vaalele fou, fou lava matua fou. O upu foi lele a loomatutua tua, se aumai lava o la e pipii ai pepa iila. E faapena la le vaalele lea o le a aumai. O le taimi leni o la e faatoa vali, a o ananafi na ave ai nofoa i totonu. Tusa e 20 nofoa faapooopo, e tele atu i le vaa la e i ai nei, e tele foi ana uta e mafai ona ave. E taumafai lava tatou ia tatou malo foi i freight e ave i fafo ma aumai. O lea e manao foi le Samoa Air ia tatou tauva ma Niu Sila, lea la e i ai le tatou vaalele lea e tele le capacity e ave ai oloa. E sili atu le taugofie o le lisi lea la a i ai nei i lo le lisi lea e i ai nei, ona o a tatou lava tama fanau lea ua koleni e tauavea le tatou vaa fou lea. O le vaa lea e sui ai le vaa lea e i ai nei. O le a toe faafoi le vaa lea e i ai nei, ae faaauau le tatou vaa fou lea, lea e talanoa atu o le 737Max. O le latest lava lea o le 737Afleet i le taimi nei. Ia, o se laasaga taua mo le atinae i luga o tatou. O Iuni, Iulai e taunuu mai ai le tatou vaa e lua ai loa tatou vaa, e vaavaalua la ma le vaa fou lea. O le tatou vaa la lena e lua ai loa tatou vaa, ia, ona taunuu loa lea o le miti lea mai le amataga, sa tatau lava ona amata i le lua i le tolu tatou vaalele. O le fautuaga lena a i latou popoto i mea nei tau vaalele na omai fai le tatou Lipoti, e tatau lava ona lua i le tolu vaalele e amata ai se fleet. A o tatou i lo tatou lototetele, tatou alu i le tasi, e oo atu i lea tausaga ua lua, ia o lea lava o le a taunuu, ae faamoemoe i le lagolago a le tatou Malo i a tatou atinae.

E faamalo atu i le Komiti Faatonu o le Samoa Airways, e le faigofie le tatou auala na tatou ui mai ai, e faapena foi le Pule Sili. E le faigofie i le tele o faitioga i tagata o lo o taumafai e talepe le miti a le tatou Malo ae le i silasila i tulaga ua fua mai ai. E faafetai atu i le tatou Palemene, faafetai atu ia Samoa atoa i la outou lagolago, o le tatalo lava, ia omai pea e atinae le tatou vaalele, o le vaalele a le tatou Malo o Samoa, e faamoemoe atu ia te outou.

Lau Afioga i le Fofoga Fetalai, ona pau lea o nai mataupu, faafetai mo le avanoa. Faafetai atu i lau Afioga, ou te tilotilo atu lava i le aafia o lau Afioga i mai o le tino ae o lo o e faafoefoe pea le tatou Fonotaga nei, e ui ina faigata nisi o le aualii la e nonofo mai o, ae o lo o faafoe pea e lau Afioga. Ma lou faaaloalo. Faafetai.

FOFOGA FETALAI: Faafetai. Malo i le saunoaga a lau Afioga i le Minisita. Ia maua pea le tofa i le feagai ai ma galuega e atiae ai le paia o le tatou atunuu. Ia, ma o lea ua tatou see mai i le Afioga i le Sui Palemia. E tapa ma le faaaloalo lau Afioga i le Sui Palemia.

Afioga Hon FIAME NAOMI MATAAFA (Sui Palemia, Minisita mo Punaoa Faalenatura ma le Siosiomaga): Lau Afioga i le Fofoga Fetalai, le paia i le Maota fono a Samoa. Ou te tulai atu ma le faaaloalo, e faaauau le pito laau a le Malo, i le tali atu i le felafolafoaiga i luga o le Tala Faatatau Faaopooopo Nu 1 o le Tupe 2018/2019. Faafetai i le alofa o le Atua i le taitaiga mai i le lagi e mama le soifua lelei i lau Afioga i le Fofoga Fetalai, faapea sui usufono mamalu o le Maota fono o Samoa. Avea leni avanoa e molimoli atu ai moomooga lelei mo leni tausaga fou, faapena ona taimua le Atua i le sa o Samoa i leni tausaga aemaise le galuega a le Palemene ma lo tatou Malo.

Lau Afioga i le fofoga Fetalai, e muamua ona faamauina le agaga faafetai i le Komiti o Tupe e tusa ma le latou lipoti, mo le Tala o le Tupe Faaopoopo Nu 1. Ma e talia ma le faafetai, ia vaega ua faasoa mai mo lenei Matagaluega. E pei ona i ai nisi o faaopoopoga mo Matagaluega i le siitia lea o totogi o le au faigaluega i le faamoemoe o le Malo i le siitaga lautele, o le a faapea ona faasolosolo. Ma ou te talitonu e le o se mea mama ia le fuafua a le Malo i lea taimi i lea taimi, i le tupe e tuu atu i lana aufaigaluega ma ua talifetaui foi le fuafuaga i lenei vaitau, aua le siitia o totogi, e fesoasoani ai i le tau o le soifuaga. E le gata mo le aufaigaluega lava ia a le Malo, ao le sosolo atu ai o faamanuiaga mo tagata lautele, e tauala atu i siitaga faapenei. Faafetai foi mo le faaopoopoga, ua faapena ona faaleleia ai nisi o aitalafu a lenei Matagaluega. I le faatinoga o auaunaga mo le taugologolo lea i faalavelave faafuasei. E pei ona i ai a tatou pou ia o lo o faaaogaina ma le kamupani a le Digicel e faapena ona mafai ona ave atu i ai le logo i taimi e tutupu mai ai faalavelave faafuasei.

Lau Afioga i le Fofoga Fetalai, o nisi o mataupu sa laga mai e sui mamalu i le felafolafoaiga lenei, e i ai a tatou moli ia e faaola i le malosi o le la. Ma e pei ona silafia e le Maota le faamoemoe o le Malo ua faapea ona faataatia, ia oo atu i le tausaga 2025 ua selau pasene le eletise o le atunuu e maua mai i le malosi faafouina. E le o se taumafaiga faigofie, ae o le matau i lenei vaitau ma le faasolosolo o galuega faatino, ua ova i le limasefulu pasene o lena faamoemoe o lea ua mafai ona tatou ausia nei. E ala mai lea i le malosi faafouina e maua mai i le la, malosi faafouina e maua mai i le suavai, ua faaopoopo mai i ai le savili e pei ona faataitai ai i le atu Aleipata, ma faapea foi i nisi ma nisi o vaega i le susunuina ia o otaota o vao bio gas, o lo o faataitai i nisi o nofoaga. O ni poloketi laiti, ae o le poloketi tele lava o le tatou faamoemoe lea i le **STEC**, o le a faapena ona fai ai se atinae tele, e gaosia ai le eletise e ala mai i le susunuina lea o otaota o le vao. I le aumai lava i le mataupu lea o moli o lo o faaeletiseina i le la, o le tatou polokalame lea atonu o lea e silasila i ai le Maota ua mafai ona faataape atu i tua. O lo o i ai lava o tatou moli auala e pei ona taulamua ai le malosiaga faaeletie. Ao tatou moli ia o solar lights o lo o ave le faamuamua i nofoaga faitete i totonu o nuu ma afioaga, e i ai aoga faapea ma nofoaga o ekalesia po o nofoaga e tapuvaetasi i ai le atunuu i totonu o nuu ma afioaga. E faapea foi le faamoemoe i totonu o le taulaga e le gata i Apia ae faapea foi i Salafai, e faapena ona fesoasoani ina ia faamalalamalamaina ia nofoaga faitete ia. E le gata o le faamatagofie ae o le maua lea o le saogalemu o le atunuu e faafioai. Ou te manatu, o moli faapenei e alu i le la, ou te iloa o le a faapena lava ona faaopoopo le faaaogaina e i tatou, aemaise o le tuliloaina o lo tatou faamoemoe lea, ia ausia le selau pasene o le eletise e faaaogaina i totonu o le atunuu e maua mai i le malosiaga faafouina. Ona ou see mai ai lea i le mataupu i le polokalame lea o laau e lua miliona o lo o taulamua ai le Matagaluega o le Punaoa Faalenatura ma le Siosiomaga. Lau Afioga i le Fofoga Fetalai, e faigofie lava le faamalalamalamaina o lenei polokalame. O laau o le sao tele o laau o le mafai lea ona mimiti kapone po o kasa leaga e faasao ai le soifua maloloina o tagata soifua. Ae e tele fesootaiga aoga, e le gata i le tulaga lea o le mitiia o kasa leaga, ae mafai ona tatou galulue faatasi ai i le totoina o laau nei, i le puipui mai o le talafatai o tatou coasts, ma faapea foi ma tatou laufanua apovai. O isi foi vaega ia o lo o faatalatalanoa atu pea i le atunuu e le Matagaluega, ia tatou galulue faatasi ina ia

faapea ona faaleleia ia tulaga ia. E le gata foi i lea, o lenei polokalame o le totoina o laau e 2 miliona, e i ai lona fesoootaiga taua ma le Matagaluega o Faatoaga. Aemaise i le itu lea o le faatumauiina lea o le lava o taumafa i totonu o le atunuu. Pe o le faatupuina foi o le totoina o tatou niu. E i ai lava polokalame a Matagaluega o Faatoaga o lo o faapena ona faagasolo ma agai i ai. E le gata foi i lea o le laau e pei o le ulu, e tele foi talanoaga e fuafua i le aoga o le ulu, e fai mai ai le falaomata, ae le gata i lena, o le toe faaola ma le toe faatulaga lelei mai o tatou folesi. O folesi foi e le gata e aoga ia laau e pei ona talanoaina muamua ao le folesi foi o le isi alaoa lea mo lo tatou atunuu, pe a faapea e lelei ona fuafua ona faagasolo le faagaina o a tatou folesi. Ma e tatalo atu pea ia outou afioga i sui usufono mamalu o itumalo, faafogafoga mai foi le atunuu i Fonotaga a le Palemene, e manaomia lava lo tatou galulue faatasi. Ma i le faapea mai foi e tapena atu ni laau, e leai se mea e afaina ai, o lea e tele laau e maua mai Nuu. E i ai foi polokalame o lo o faapena ona faatulaga i nofoaga o lo o faafailele ai a tatou laau. Ae ia outou afioga i sui mamalu, e le o se mea faigata lena mea o le gagau mai o le lala i le isi laau toto, o la e i ai a tatou popo e maua ai a tatou niu. Ae pei o le a tatou maua i le mea foi lea, o le mananao e fafaga atu pea e le Malo mea uma. Ao le toto o le laau o le mea e masani ai tatou, o le mea e faigofie ona fai, ae tatou galulue faatasi e tusa ai ma faiga faavae a le Malo. Aemaise o le puipui mai o le tatou siosiomaga, puipuiga o tatou gataifale, faapea ia tatou nofoaga apovai ina ia faapena ona saogalemu ai ia lo tatou siosiomaga, aemaise o le faalagolago i ai o le atunuu mo lona manuia.

Lau Afioga i le Fofoga Fetalai o taligalu. O taligalu o le tele lava o le faamuamua i faiga faavae a lo tatou Malo o le ave lea i le puipuiga o aseta a le Malo e pei ona i ai a tatou auala tetele. E i ai nisi o vaitafe e pei ona i ai le galuega tetele lea o lo o fai i Vaisigano o lo o faapena ona fai ai galuega tetele, ia o lo o ave lava i ai le faamuamua. Ae i ai le fesoootaiga o taligalu ia e talosaga mai ai nuu ma afioga ma polokalame ia e pei o le toe totoina o laau. O isi auala ia e mafai ona fesoasoani ai, e tau taofiofi mai ai le solo o le palapala ma le elelee, o le toto o laau. E oo lava i le toe totoina o togo i le sami faapena ona taumafai e toe apo mai ma toe faafoi mai le laueleele ua faapena ona solo ese atu. E i ai nai polokalame laiti, ae ou te matauina pea i le saunoa mai ma talosaga mai foi a outou afioga i sui mamalu usufono, aemaise o taligalu nei mo nuu ma afioga, o lea tatou te talanoa i le Tala o le Tupe, tatou te mafaufau i le mea o le tupe faaalu ma lona aoga i le mea lea e fua agai i ai. O le faataitaiga, o nisi o talosaga e faapea e puipui mai ai po o le falekomiti, ou te le faapea atu e le taua le falekomiti. Ae fuafua le \$2miliona o le taligalu, i le puipui o le falekomiti ma le puipui o le aualatele o le Malo o lo o fegasoloai ai le atunuu. O mea ia e fuafua i ai i tatou o e o lo o talatalanoa ma tatou faasoasoa ma fai a tatou faiga faavae. Ua i ai foi fuafuaga faataatitia, o nisi o tapenaga e auala atu i le matou Matagaluega. O nisi o tapenaga o lo o faapea ona faatino e le Matagaluega a Tina ma Tamaitai, i fuafuga a nuu ma afioga i galuega o lo o fia fai. E ala ona faia ia galuega, o le tau tapue mai lea e le Malo o le atoatoaga o le manaoga o lo o i ai. E le gata i le faaleo mai e tou afioga i totonu o le fonotaga lenei, ae o lo o fai ia fonu o soalaupule ai le Matagaluega ma nuu ma afioga, e talanoa ai i atinae ma galuega o lo o manaomia i lea itu ma lea itu o le tatou atunuu. E mafai foi ona fuafua atu i ai le Malo i ana galuega faatino.

Lau Afioga i le Fofoga Fetalai, saunoa foi nisi o sui usufono, e faataua le lui tele lea e feagai ma i tatou i le faaaogaina o plastics. E pei ona silafia o le masina nei, o le a aloaia ai le tapu ona faaaoga o tagapepa plastics foi ia e masani ona ave ai a tatou faatauga i totonu o faleoloa. Ma ou te faafetai atu i le au faipisinisi i le tali mai i le faiga faavae ua faatulai atu e lo tatou Malo. O lea ua galulue faatasi ai ina ia oo atu i le taimi e aloaia ai. O le faaiuga o le masina nei, o le a faapea ona amata ai le tulaga lea, taga pepa plastic, faapea foi ma mea e mimiti ai vai straws. Ae ou te manatu o se mea amata lea, o le a faaaauu atu pea la tatou polokalame lea, ae taua lava le o faatasi ma a tatou vaega ia o le au faipisinisi, aua e le manao foi le Malo e ave ana faiga faavae pe faafuaseia le ave atu o se faaiuga a le Malo, ae tataua ona lava le taimi e tapena ai, ma saili foi le aufaipisinisi ia i isi oloa, e sui ai ia oloa ia ua amata ona faapea ona tatou vavae esea ona o le afaina ai o lo tatou siosiomaga. O le faataitaiga lau Afioga i le Fofoga Fetalai ma le mamalu o le Palemene, o tatou ia tatou sauniga e fai ai o tatou faalavelave. E ese le tele o ipu lapotopoto e fai o latou tapuni po o ipu foi ia papae faapena, o fagu vai, o isi mea ia e tele i o tatou faalavelave. E tatou te mafaufau la i aafiaga o le siosiomaga, ae e i ai foi isi itu o le faatinoga o tatou sauniga faapenei, tatou te iloa uma lava le taugata, e ese le taugata o ipu ia, alu ai a tatou tupe, ae le iloa pe aoga atu le faaaoga o tatou tupe i le isi mea. Ae **tautala** mai foi ia tatou tu ma a tatou faiga po o talafegai i lenei vaitau. Ou te faafetai atu ai i le taulagalaga mai o a outou afioga i sui usufono. I le mataupu lava leni i plastics lea na saunoa foi i le tulaga o le faaaogaina o fugalaaui plastics. E tele lava ma lautele, e le laititi le mataupu leni, ae o le isi autu o lo o.....ma le faaaogaina o mea nei, o le otaota, pe faapefea ona tatou faaleleia le faaputuga lea ua tupu nei i totonu o le atunuu, e le gata i le lauelele ae ua sosolo atu i le sami ma afaina le tatou talafatai. E le o se mea faigofie la le faiga faavae o lona faatinoga o le fuafuaga o le taimi, e faatino ai. Ae o le mea e pito taua, o le tali mai o le atunuu ina ia mafai ona tatou galulue faatasi. Aua o le mea moni lava ia, o le sui o le tatou amio, o le tatou masani. E faigofie ona tatou tapa atu i oloa nei o lo o gaosi i le plastic ae e i ai isi ona ogaoga matuia, o lea ua amata ona afaina ai lo tatou siosiomaga, ma le soifua manuia o tatou tagata.

Lau Afioga i le Fofoga Fetalai, talanoaina foi lo tatou taulaga nei ma le faaaogaina o le nofoaga faitele e fai ai ia faatauga. E le o.....o se mataupu fou ua laga mai, e tele Matagaluega e galulue faatasi e iloilo ia mataupu nei. E le gata i le matou Matagaluega aua o matou e faasoa atu le avanoa e fai ai tulaga ia. O mataupu o le Matagaluega o le au faipisinisi, o le tatou vaega o lo o vaai auala aemaise foi leoleo o e o lo o gafa ma le vaai ma le puipuia o le saogalemu o tatou tagata. E fetuunai lava i le mea lea, o le.....i le isi itu, tatou te manaomia le matagofie o lo tatou taulaga, o le isi itu ia maua pea avanoa mo e o lo o fai nai a latou pisinisi laiti. Ou te manatu e taua le finagalo ua faaalua, ma atonu ua latalata le taimi e tataua ai ona fai se faaiuga e tataua ai ona fai ma ave atu ai i luga o le Kapeneta mo sana faaiuga. Aemaise lava o lo o faagasolo pea le galuega o lo o Taitaifono ai le Palemia, i le tulaga lea o le faamatagofie o a tatou taulaga aemaise le taulaga i Apia.

O le vaaiuga lea o le faamamaina o a tatou vaitafe, masalo o le vaega lava lea o lo o galulue faatasi ai le Matagaluega leni ma le LTA, e faapena ona tapena ma teuteu ma faalelei, ae o le mea lava lea e tupu o le tiai otaota o o tatou tagata. O

lea foi ua amata ona vaai ua tatau ea ona fai se Tulafono i lenei mea o le faaotaota. Mo nisi o outou foi ia ua malaga i fafo, e pei o Singapore le atunuu e pito i sau ana pulega ae o se atunuu pito mama. Ma e augata lava le mafaufau e faapea o mea uma lava o le tulafono, o mea uma lava o le Tulafono. Ae i ai le faamoemoe mauualuga o tagata Samoa o tagata aoaoina ua oo mai le malamalama. O tagata Samoa foi o tagata e mama nofoaga, aua e fai mai lava e e malaga mai i Samoa, e ese le matagofie o Samoa, e mama ona nuu ma tulaga faapena. Ao lea lava tatou te iloa o lea lava e i ai la tatou amio lea e fai, o le tiai otaota, e faaotaota i o tatou tafaala, e faapena lava ona o tatou vaaia tulaga faapea. Ae o le isi lui tele lea o lea e feagai nei ma i tatou, ma ia o tatou manatu o Samoa o se atunuu o se motu e laititi ua amata ona tupu le otaota le waste. A tatou le faaeteete i le tatou amio lea e fai, e tele lava lo tatou afaina. Ao mea lava e mafai ona fai e tatou, e le tau fai atu foi se Tulafono a mea o le tulaga lea ma le tulaga lea. Ae a faapea lava e tatau ona fai, ou te manatu lau afioga i le Fofoga Fetalai ma le mamalu o le Palemene, e faigofie foi ona tatou o i le auala a Singapore e faamatagofie ai ia lo tatou atunuu ma taofi mai ai le amio, le amio sese le amio faavalevalea lea o le faaotaota i totonu o lo tatou atunuu.

Lau Afioga i le Fofoga Fetalai, atonu ua faamuta ai i sa matou faamatalaga i nisi o mataupu sa laga mai. Ia manuia tele toe taimi o le faamoemoe o lenei Fonotaga. Soifua.

FOFOGA FETALAI: Malo saunoa i lau Afioga i le Sui Palemia, faafetai mo le saunoaga manino. O lea ua oo mai le faasologa i le Palemia.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr SAILELE MALIELEGAOI: Lau Afioga i le Fofoga Fetalai, o le faafetai i le Komiti, e faapea foi ia sui usufono mamalu o le Maota. O lenei ua uma ona saunoa atu ai le Sui Palemia ma Minisita o le Kapeneta. O le lelei foi lea o le faamulimuli, e oo mai ia te au ua leai lava ma se mea o totoe, ae ua uma foi ona ou tali atu i mea sa laga mai. O le mea lea lau Afioga i le Fofoga Fetalai, i nai minute ia e totoe tatou sagai loa e auiliili le Tala o le Tupe.

FOFOGA FETALAI: Ua maea nei felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 1) 2018/2019. Ma o le a tuuina atu loa le fesili e tusa ai ma lafo i le aso 24 Tesema 2018;

Na faamaonia le lafo na faatuina i le aso 24 Tesema 2018, ma faitauina ai le Tulafono Tau Faaofi o le Faatatauina o Tupe Faaopoopo (Nu 1) 2018/2019 i lona faitauga faalua.

FOFOGA FETALAI: O le galuega e sosoo ai o le faitauina o Tulafono Tau Faaofi o Tupe Faaopoopo Nu 1 2018/2019 iloiloga auiliili. O le a sagai atu loa le Fono Aoao i le iloiloga auiliili o le Tulafono Tau Faaofi o le Faatatauina o Tupe Faaopoopo Nu 1.

I le faagasoloai o le Iloiloga Auiliili o le Tulafono Tau Faaofi e mafai ona saunoa faatepa Sui usufono i mataupu o lo o tusia i le P.P. 2018/2019 Nu 94, Tala

Faatatau o Tupe Faaopoopo muamua o Tupe maua ma Tupe totogi a le Malo o Samoa mo le tausaga faaiiina aso 30 Iuni 2019, faapea le lipoti a le Komiti o Tupe maua ma Tupe totogi i le Tala Faatatau muamua o Tupe Faaopoopo 2018/2019

E tusa ai ma le Tulafono Tumau 135, e amata le Iloiloga Auiliili o le Tulafono Tau Faaofi i ona Faamatalala:

FAAMATALAGA MUAMUA

**VAEGA TUPE MA TALA FAATATAUINA
FAAOPOOPOGA I TUPE FAATATAUINA**

MATAGALUEGA	FAAMATALAGA	AOFAI O TUPE ALU
	FAATOAGA MA FAIGAFAlVA:	\$387,693.
	<i>Faamaonia.</i>	
	PISINISI, ALAMANUIA MA LEIPA:	\$68,995.
	<i>Faamaonia.</i>	
	FESOOTAIGA MA FAAMATALAGA TEKONOLOSI:	\$31,002.
	<i>Faamaonia.</i>	
	AOGA, TAALOGA MA AGANUU:	\$2,012,531.
	<i>Faamaonia.</i>	
	TUPE:	\$2,58,2,181.
	<i>Faamaonia.</i>	
	VA I FAFO MA FEFAATAUAIGA:	\$66,062.
	<i>Faamaonia.</i>	
	SOIFUA MALOLOINA:	\$108,835.
	<i>Faamaonia.</i>	
	FAAMASINOGA MA PULEGA TAU FAAMASINOGA:	\$319,839.

Faamaonia.

**PUNAOA FAANATURA
MA SIOSIOMAGA: \$416,578.**

Faamaonia.

LEOLEO: \$363,879.

Faamaonia.

PALEMIA: \$66,186.

Faamaonia.

TUPE MAUA: \$151,547.

Faamaonia.

**TINA & TAMAITAI:
ATINAE O NUU MA
AFIOAGA MA AGAFESOOTAI: \$108,536.**

Faamaonia.

**GALUEGA FELAUAIGA:
MA ATINAE ESEESE: \$54,773.**

Faamaonia.

LOIA SILI: \$79,222.

Faamaonia.

**PULE MA SUETUSI
SILI: \$54,058.**

Faamaonia.

**KOMISI O FAIGA
PALOTA: \$261,197.**

Faamaonia.

FONO AOA O FAITULAFONO: \$352,716.

Faamaonia.

**KOMISI O GALUEGA
A LE MALO:**

\$69,115.

Faamaonia.

FOFOGA FETALAI: Ou te tapa lau Afioga i le Palemia.

**Susuga Hon TUILAEPA AUUEA FATIALOFA LUPESOLIAI NEIOTI
AIONO GALUMALEMANA Dr. SAILELE MALIELEGAOI:** Lau Afioga i
le Fofoga Fetalai, ona o lea ua vaai atu toe tasi lava le minute ta le 1:00 ua ou
faatuina atu ai le lafo, atonu ua matagofie foi le malolo i lenei aso se i faaauau i le
aso a taeao.

FOFOGA FETALAI: Ia, ua faatuina mai le lafo ina ia faamuta le tatou
galuega, ona o le manatu foi ina ia faapena ona tulei le tatou galuega ia vave ona
faatino galuega a le Malo o lo o faamuli mai, aua le Kapeneta aemaise le atiaaina
o le atunuu. E i ai le manatu o le a faamuta ai i le tatou i le tulaga o le auiliiliga o
le Tala Faatatau Faaopopo (Nu.1) o le Tupe 2018/2019 i le Matagaluega o le
Fono Aoaofaitulafono. Malo faafetai.

E i ai le manatu o le a... Ua faatuina mai le lafo ina ia faamuta le tatou galuega
mo le aso ae tolopo mo le... Ia o le lafo ua uma ona faataatia i le tatou uluai Fono
ina ia faapena ona faamuta le tatou galuega mo le aso i le itula e 1:00 ona toe
faaauau ai lea i le Aso Fono e sosoo ai, le aso a taeao. E i ai le manatu ua uma ona
pasia le lafo ma e le toe agavaa foi le tuuina atu o se fesili aua ua maea ona pasia
e le Maota ona ou manatu lea o le a tatou tolopo e tusa ai ma le feau ma le
galuega ma le fonotaga i lenei aso mo le aso Fono a taeao i le 9:00 i le taeao. Ou
te tapa le sui usufono mo Siumu e na te faaiuina le tatou Fonotaga i se tatalo.

***Na tolopo Taualumaga a le Fono Aoaofaitulafono i le itula e 1:08 i le afiafi
seia aulia le itula e 9:00 i le taeao o le Aso Farai, 25 Ianuari 2019.***